

# HEBREWS

## Lat Inan Pam Wanch Hebrews Al-Alantan Umpin

*Nil God.angan Puk Nhengk Nungantam Kuch  
Wik Min Thamp*

<sup>1</sup> Aak keenkanamana nil God.angana wuut mangk ngamparam al-alantan wik many-manyam waa thant. Nil wikim kuch thanttang, pam prophets nungantam al-alantang, than wikan yipam waa ayn pam wanchantan. Wiyiya God.ana pithang thaw thant, puth wiyiya ngaantiyongk wampin thant. A ngul-ngulana than wik chil yot ngul waa -waa in thanta pam wanchantan, nil yimanamana.

<sup>2</sup> A aak ngul-ngulana God.angana puk nhengk nungantam anan kuch nunanga wik min thampa, nilan-a, waa -waa ngul ngampara. Aak keenkanam anpalmana, nil piip God.an thawa nhengk nungantam alantan aakan yumpow thamp, aak inman umyompanamana putha aak in kenyan, a putha nil God.an thaw yuk way min aak an kenjana a putha yuk way min aak inpalana an nungantam thamp puk nhengk ngatharamantam.

<sup>3</sup> Nil nhengk nungantam ke piip God anmana, thonam anman pulaniya, pam pi ana a pam minam paththama. Nil nhengk God.antam alangan aak inmana ma thayanang pi -pi ana. Nil puth uthama a putha thaa -pant thaw an ngamparam

nil God.angan yipam ngangk pachathow ngampang way anpalaan a amanamaniya nil aak keny ngulan mat, pam pi an karpam iianpul God.anga ke thonam yimanangana.

*Nhengk God.antaman Wuut Pi an, Ngaantiyongk Anangan Ya a*

<sup>4</sup> Nil God.angan pam thonam anman nhengk waa an nunang, nil ngaantiyongk nungantam anangan puk nhengk ke am waa an thanang ya paththam. Nil nhengk nungantamana wuut pi an thampa yump nunang – ngaantiyongk anangan ya a.

<sup>5</sup> Nil God.an wik inangan ke am thaw thant ngaantiyongk al-alantanweya,  
“Niiy nhengk ngatharama.  
Ngay niiyangan mi ang moom pi an iiyān ngatharangana.”

A putha nil wik inangan ke am thaw thamp ngaantiyongk al-alantanweya,  
“Ngayiya piip niiyantam ngul iiyāng,  
niiyiya nhengk ngatharam ngula.”

Ya a, nil God.an wik yimanangan Christ.antan ep thaw, puth ngaantiyongk al-alantan ya a.

<sup>6</sup> A puth inan thampa, nil God.angan puk nhengk nungantam kaa -thonaman kuch aak iikanakana, nilan thaw ngaantiyongk al-alantana,

“Niiy ma mangkaman thuchān nungant a putha thaa -kuumpān nunang Christ.ana.”

<sup>7</sup> Nil God.angan mi thanang ngaantiyongk anangana workan iiy-iiyayn nungant. Nil thamp thawa:

“Thananiya ke wunt yimananga,

puth ke thum nganthan pench-penchan  
yimanang thamp iyy-iiyantana.”

<sup>8</sup> Puth nil wik inan thawan nungant puk nhengk  
nungantam Jesus.antana:

“Nint ke ngay anmana Goda putha nintana moom  
pi an paththam wun-wunangan ngatha-  
rang aak umpuyama.

A nint moom min-minam paththam iyy-iiyangan  
thant pam wanch nungkaramakana.

<sup>9</sup> A nintam thonam anman min paththaman iyy-  
iiyangan,

way anangan nint kaangk ke an.

Nintan puth kaangk thathān thanang pam wanch  
anangan minan iiyayn,

nint kaangk ke -ke am paththam thathān thanang  
wayan iiyayn.

Puth anpalmaniya ngaya piip nungkaram  
God.angana ngangk min paththam  
yumpāng nintang, ke pam wiy  
yimanangan ya a.”

<sup>10</sup> A nil God.an inan thaman thawa nhengk nun-  
gantamak:

“Ayyang! Lord-ang! Aak keenkanamana, nint aak  
an kenjana yumpan a putha aak inmanan  
yumpan.

<sup>11</sup> Aak inmana putha aak an kenjana ngul  
wayamowpul puth nintana ep aak  
umpuyamak wun-wunān.

Putha aak an kenjana a aak inmanana an ke  
kulich kath yimanangan ngul wayamow-  
pul,

<sup>12</sup> a nintana ke kulich way kath yimanangan  
puyamam ngul thee ān pulang.

Puth ngulaniya aak inmana putha aak in kenjana  
 aak nyiinganam wiy-wiyam weenowpul.  
 Puth nintana wiy-wiyamana ke yumpin nungka-  
 mangan ya a,

an nint anman wun-wunān aak umpuyamakan.”  
 Nil God.an wik yimanangan thaw nhengk nun-  
 gantamakana.

<sup>13</sup> A thon inan, nil God.an ke am thaw ngaantiy-  
 ongk nungantamakana:

“Niiyaniya moom pi an ngatharang iiy-iiyāna  
 a ngay ngul maalathāng thanang than niiyangan  
 ngangk-wayangaman kal-kalayn.

Niiyaniya moom karangk paththam iiy-iiyān  
 thanta.”

Nil God.ana wik yimanangan ep thaw nhengk  
 nungantamak Jesus.antan.

<sup>14</sup> Puth ngaantiyongk anangan-y-a, thananiya  
 oony min-miniy paththama nil God.angan  
 kuchan thanang ma-aath-aathayn thanang  
 pam wanch anangan nilan kaa-piichanathow  
 thananga.

## 2

*Nil God.angan Kaa-Piichanathow Ngampang  
 Anangan Wik Nungantaman Ngangkangan Pi-  
 Pi anamp*

<sup>1</sup> Nil Christ.an pi an paththama, puth  
 ngampaniy-a, ke-ngoongkam wik min anana  
 ngaantam-ngeey-ngeeyāmpa wik ka athaman  
 ngeeyamp nungantamana, ngampan yipam ke  
 thech-thechāmp nungantam anpalana ke yuw  
 yimanangan thech-thechathan wuntangan.

<sup>2</sup> Ngaantiyongk al-alangan wik thayan God.antaman keenkanaman waa -waa in Moses wee anang al-alantan. Wik thanntaman-a, an kan-kanama. Than pam wanch wiyangan wik thayan anangana ke am ngeey-ngeeyin, than way ke -ngoongkam iyy-iiyin, a anpalana nil God.angana wayath thanang. Nil ke am aak-ya angana wayath thanang ya a, than wik nungantaman ke am minaman ngaantam-ngeeyin puth anpalan nil wayath thanang.

<sup>3</sup> Puth ngampaniy-a, wik kanam ngeeyampa nil God.angan kaa-piichanathow ngampang. Ngampwey wik nungantaman ke an ngangkang pi-pi imp-a, yaa, nilaniya ngampang thamp wayathow puth ngampaniya mee nungantam anpalan ke mo impa, ngamp ke appenchimp nungantamana ya a. Nil Jesus.angana ka athaman wik minam waa nil God.angan kaa-piichanathow ngampanga. Than pam puongk wiyangan ngeeyin nunang nil wikan waa -waa thant, a than pam al-alanganiy-a, wik ngampar kan-kanam ngulan waa -waa in.

<sup>4</sup> A nil God.angan thamp meenath ngampar wik inangan kan-kanama, nil puth meenath ngampar work wuut pi-pi anam anangana, a putha nil Ngeen-Wiy Min nungantaman thamp kuch ngampar ngangk ngamparangan wunow, nil yipam thayanathow ngampang thon-thonan, work minam yipam iiyāmp nungant.

*Nil Christ.an Moom Pi an Paththama*

<sup>5</sup> Nil Christ.an moom pi an ngampar. Anpalaniy-a, nil God.angan ngul meenathow nunang moom pi an paththaman mee pam

wanch yotantang. Nil puth God.ana ngaantiyongk al-alantan ke am thaw moom pi an iiy-iiyayn, ya a.

<sup>6</sup> Than keenkanaman wik inangan umpin lat ngench thayanangan:

“Ayyang, Piip God-ang, ngan pam wanch inangan pi an ya a, aak puy-puyan wunanana, ngan meek ya a, nintam thonakam pam pi an, puth nintam ngaantam-ngeey-ngeeyangan nganang

a putha minaman pi -pi angan nganangweya. Inan min paththama.

<sup>7</sup> Puth nintam yumpan nganang pam wanch inangan ke moom aak iikanakana.

Than ngaantiyongk anangana chil pi an iiyantant, puth ngananiy-a, manya.

<sup>8</sup> Puth nintaniya, Goda, yuk way min ma mangkam aak inganiya ma pam wanchantang nganttang thee an.”

Wik inangan lat ngench thayan anpalana thawina nil God.angan yuk way min ma mangkamana ngulan thee ow ma ngamparang pam wanchantang, yuk way min ma mangkamana puth an ya yippak, ke am wamp, aak ananiya, ngampaniya ke am yippak thathamp.

<sup>9</sup> Puth Jesus.aniya an epa, ngamp mee miy nunang, puth nilaniya ke pam anman iiy-iiy aak inganiya, nil pi an ke am yump nungamang, ke ngaantiyongk yimanangan. Niliya ke ngamp yimanang iiy-iiy. Puth than pam wanch alalanganiya way anman yump-yumpin nungant a nil utham ngul. Puth anpalana nil God.angana moom pi an paththam yump nunang. Nil piip

God.ana min iiy ngampar, nil puk nhengk nungantam Jesus.an kuch ngampar yotamant uthamowa.

<sup>10</sup> Puth puungk wiyangan pam wancha wayan yump-yumpin puk nhengk nungantamakan, thaa -thengk-thengkathin nunang thakan. Nil puth God.an ke am thaw thant ke an way yumpayn nungant ya a. Nil piip God.ana thayan paththama, nil aak inan yump ngampar, a nil minam anman pi-pi an aak inaniy. Nilan puth mee miy aak wayam anpalana, aak min ngul wunow ngampar, puth an mina nil ke aman thaw thant pam wanch al-alantan ke an way yumpayn nungant nhengk nungantamak ya a. Wayan kuyam yumpin nungant-a, an nil ke-ngoongkam anman iiy-iyy, wik way thanttam ke am kuyam ngeey. Nilan puth woyan minan meenath ngampar ngamp want-wanttakan iiyāmp nungant God.antana, nil ngampang yipam kaa-piichanathow woyan way anpalana, a ngampan aak umpuyam ngulan yipam wunāmp nungantang.

<sup>11</sup> Ngamp pam wanch anangan nil Jesus.ang ngangk kanaman pachath ngampang way ngamparam anpalan-a, ngampaniy-a, ma -kuuncham iyanamp nungantang Jesus.antangan, nil puth God.aniya piip ngamparam karp Jesus wee anang ngampar. Putha nil Jesus.an ke am ulp, ngulnyaa an ke am wun nil kuunchan waa ow ngampang pam wanch nungantam inangana.

<sup>12</sup> A nil Jesus.an thaw piip God.anta,  
 “Ngay nintang ngul waa āng thant kuunch ngatharam al-alantana.

Ngay thaa-kuumpāng nintang thamp a aak-pathāng nungkar angman thanatangan.”

<sup>13</sup> Anpalaniya nil Jesus.an wik inan ngul thaw thant, “Ngay God.an monkan-wak-wakang nunang kon utha.” A wik thon inan thawa, “Ngay inman karpam iyy-iiyang thanatang pam wanch God.antam al-alantang nilan ma ngatharangan thee thanang ngay yipam min-minakam pi āng thanang.”

*Nil Jesus.an Aak Iikanakan Uk-a, Nil Pam Ween Ke Ngamp Yimanangan Iiy*

<sup>14</sup> Pam wanch God.antam anangana, nil God.anganiya nhengk waa an thanang, thananiya kempa putha chaapar thamp iyy-iiyantān. Nil Jesus.an ke -paal uk aak iikanakan pam ke ngamp yimanangan yipam iyyow, nil nath yipam oony way pi anan tha ang pekam maakow nunang. Oony way inan-a, an karangka, an pam wanchan mul-mulathana. Puth nil Jesus.an uthaman-a, an nil kanam tha ang maak nunang oony wayaniya.

<sup>15</sup> Pam wanch wiy anangan winynyanan mo antan mulamana, ma-yotaman ngangk akangam than-thantan. Nil Jesus.angan oony wayan kanan pek-pekam maakan tha angan-a, yaa, ananiya nil ngangk thayan ngul yumpan thanang, winynyang ke -ngul mo antan.

<sup>16</sup> Ngamp puth mee miya nil pam wanch ma-aath-aathan thanang, ngaantiyongk anangan ya a, puth nil Jesus.ana pam ke ngamp yimanangan iiya, ke ngaantiyongk yimanangan ya a. Nil pam wanch anangan ma-aath-aathan thanang, than nunangan ngaantam-



ngeey-ngeeyantan a putha monkan-wak-wakantan nunang God.an ke Abraham.angan wik nungantaman ngeey-ngeey a putha monkan-wak-wakan ngulan.

<sup>17</sup> A nil Jesus.aniya ke pam anman iyy-iiy, ke ngamp yimananga, a niliya ke pam pi an priest thamp iyy-iiy. Than puth pam priests anangana work iyy-iiyin God.antan, wikan thaw-thawin nunganta, an pam wanchantam thaa-pant thawin nungant. A than minh min-miniy mulathin thanang a chaapar thanttamana aak ngench thayan aakanakan kalin a than God.ant mee -wuthanamin nungant, nil yipam ke -ngul ngaantam-ngeeyow way thanttam pam wanch al-alantaman. Yaa, nil Jesus.ana ke pam pi an priest yimanangan iyy-iiy nil yipam ngangk mamow ngampang, a work minam iyy-iiyow God.antan, a pam wanchantan thama. Nilaniya utham a chaapar nungantam theetath way ngamparakan a thaw ngul piip God.antan way ngamparamana ke -ngul ngaantam-ngeeyow a putha ngampangan pam wanch nungantam ngul waa ow.

<sup>18</sup> Than wiyang ngampangan thaachayn way yumpanakan-a, nilana ma -aathow ngampang ke yipam wayan yump-yumpāmp. Puth nil nhengk God.antamana pam iyy-iiy, nil oony way alangana putha than pam way al-alangan thaachin nunang thamp wayan yumpanakan, puth ya a, nil min anman iyy-iiy, a putha thanana way anman yump-yumpin nungant. Nil puth anpalan-a, pam wanch anangan minam ma -aath-aathow thanang.

### 3

*Nil Jesus.ana Pi an Paththama, Nil Moses.an  
Ya a*

<sup>1</sup> Niiyalang, ngurp ngatharam-ang, niiy ngangk kanaman thee an God.anta, niiyiy-a, pam wanch God.antam ngula. Nil ngampang ump, a ngampana ngangk ngamparamang pi-pi anamp nunang ngul a wiyant thamp waa anamp nunang. Yaa, ngampana anman ngaantam-ngeey-ngeeyāmp nunang Jesus.ana, pam anman nil God.angan kuchan ngampar, nilama theetath nungamang ngampar nil yipam kalow ngampang piip God.antan.

<sup>2</sup> Nil work minam anman yump-yump work nil God.angan thee nungant – pam nil ke Moses iiy-iiy yimanangana, work murkanim iiy, ke im want, ke Moses yimanangan iiy-iiy, pam wanch God.antaman keenkanamanim pi-pi thanang.

<sup>3</sup> Nil pam ma -kunchang aawuch kaachiwwey-a, pam wanchangana thaa -kuumpiythan nunanga, puth aawuch anan ke thaa -kuumpiythan ya a, thananiya pam anan ep thaa -kuumpiythan nunang. Nil Jesus.an ke pam anana aawuch anan kaachan, ngampaniy ke aawuch nungantam aak nilan wun-wunan. Ngamp ke -paal Christ.an thaa -kuumpāmp nunang, Moses.an ya a.

<sup>4</sup> Aawuch ma mangkaman ngampan thathanamp-a, than pamangan yumpin, puth nil piip God.angana way min ma mangkam anana ka atham nil yump.

<sup>5</sup> Nil Moses.angana pam wanch God.antam anangan minamim kal thanang, a wik minamim

waa thant. Nil piip God.ant work iiy-iiy a nil God.an wik anim waa ant-a, Moses.angana wik anmanim waa -waa thant.

<sup>6</sup> Puth nil Christ.ana puk nhengk God.antama – nilana work nungantaman min-minam yump-yump, a nilaniya pam wanch God.antam anangan min-minam pi-pi an thanang ma angam. Ngampwey nath ngangk thayanam anmanan monkan-wak-wakimp nunang Christ.an-a, a puth ngangk minangaman ngaantam-ngeey-ngeeyimp nil kan-kanam ngul kalow ngampang aak nungantamakan-a, yaa, puth ngampaniy-a, pam wanch piip God.antam ngul iyanampa, ke aawuch nungantam aak nilan wun-wunan.

*Ngampiya Wik Min God.antamana Ke Ngeengkāmpa*

<sup>7</sup> Ngampaniya wik inangan ngeeyāmpa, nil Ngeen-Wiy Min God.antam alangan keenkanaman waa pam al-alantana, a thanana umpin lat ngench thayananga, wik inangana:

“Nil God.anwey wik thawiy ngampar kinch inmanwey-a,

<sup>8</sup> yaa, ngampan wik ngeeyāmp nunanga, ke kuchek thayanani iyāmp ke wuut mangk niyantaman yimanangana kuchek thayanani iiy-iiyin aak keenkana.

Nil God.angan wich thanang aak Egypt anpalan, a minam pi-pi thanang aak pintalangan puth thanana kul thaw-thawin thaka a putha kuchek thayan yumpin thanttakam.

<sup>9</sup> Nil God.an thawa, ‘Nungkwaya thanana work wuut pi-pi anam anangan thath-thathin-a,

ngayan yump-yumpanga kaap thon-thonangana  
 forty years.akam-a,  
 puth thananiya ke-ngoongkam anman way  
 yump-yumpin, than eenchathin nganyang.'

<sup>10</sup> Anpalan ngulan-a, ngayaniya nhinthan kan-  
 ngul ngathanya,  
 puth ngayana kaangk ke-ngul ngeeyāng wik  
 thanttam anangan  
 a ngayan thawanga, 'Thanan puth kaangk way  
 anman iiy-iiyayn,  
 puth thanan kaangk ke wik ngatharaman ngeey-  
 ngeeyayn, ya a.'

<sup>11</sup> Yaa, ngayana man kul ngula paththam  
 wampangan thant,  
 a wik thayan inangan thawang, 'Thananiya ke  
 iiyayn aak min aakanakana, ya a.' "

Wik inangan nil God.an thaw.

<sup>12</sup> Ngay wik inan thaw-thawang niiyant  
 al-alantan niiy ngangk kanaman thee an  
 God.anta: niiy kan min-minam ngaantam-  
 ngeeyān niiyantakamana niiywey nath woyan  
 min anman wak-wakina, nath ya a. Niiy wayan  
 ke pi-pi ān ngangkangan a Christ.an ke man-  
 ngeeyān nunang. An niiyaniy-a, puth God.an  
 wantin nunanga yaaka – in way paththama.  
 Nil God.aniya man-yethama, nil thath-thathan  
 niiyanga.

<sup>13</sup> Yaa, ngaa thon-thonana, niiy ngangk  
 thayanathwun niiy-niiyantakam, niiy yipam  
 wayana ke iiy-iiyāna, ke yipam God.an wantān  
 nunang. Niiy wayan yump-yumpaniy-a, an  
 way al-alanganiy-a, ak-wich-wichan niiyang,  
 niiy yipam wik God.antaman ke -ngul ngeeyāna.

Niyy nath ngaantam-ngeeyina woyan wayan ke min niyanta, puth an min niyant ya a, an way paththam.

<sup>14</sup> Ngamp nathwey murkanam anman monkan-wak-wakimp nunang Christ.an-a, aak-aakanakaman ngamp mul ngulan wunāmp-a, yaa, an ngamp kan-kanam ke kuunch Christ.antam iiyāmp.

<sup>15</sup> Than keenkana wik inan umpin lat ngench thayanangan:

“Nil God.anwey wik thawiy ngampar kinch inmanwey-a, wik ngeeyāmp nunang, ke kuchek thayanan iiyāmp ke wuut mangk ni-iyantaman kuchek thayanan iiy-iiyin aak keenkan aak pintalang angana.”

Wik inangan lat ngench thayanang umpin.

<sup>16</sup> Puth than pam wanch anangan nil Moses.angan kal thanang aak Egypt.aman-a, than al-alanganiya wik God.antaman ngeeyin nilan thaw-thaw thant, puth thananiya कांग्क ke wik ngeeyayn nungantam ya a, kuchek thayan ngul weenina.

<sup>17</sup> Kaap forty.akamana piip God.an eench-eench thanttam puth thanana way anman iiy-iiyin — thananiya angman uth-uthamin aak pintalang angan.

<sup>18</sup> Nil piip God.an wik thayanam thaw pam wanch al-alantan than ke aman wik ngeey-ngeeyin nunanga, “Niyy aak min aakanakan ke iiyān, ngangk minangam ke wunāna ngatharang.”

<sup>19</sup> An puth anpalana ngamp kan ngaantam-ngeeyanamp thananga thanan ke -ngul iiyin

aak min aakanakan, thanan putha ke am minaminam ngaantam-ngeeyin nunang, ya a, than man-ngeey-ngeeyin nunang.

## 4

*Nil God.angan Aak Min Nungantamakan Kalow Ngampang Anangan Wik Nungantam Ngangkan-gan Pi-Pi anamp*

<sup>1</sup> Nil piip God.an kan-kanam yimanangan thawthawan ngampar ngamp ngangk minangam wunāmp aak nungantamangan. Yaa, niyy in ngeeyāna: ngamp ke eenchimp nungantama, nil puth ngul thaw ngampara, “Niiy aak ngatharamangan ke ngoonchāna.”

<sup>2</sup> Puth ngampana wik min anangan God.antam kanam ngeeyampa ke wuut mangk ngamparamangan wik minan ngeeyina. Puth ngangkan-gan ke ngoonch thant, ya a, an puth thanan ke am minam ngaantam-ngeeyin wik anangan kan-kanamana, thanan ke -ngoongkam iiy-iiyin.

<sup>3</sup> Puth ngampwey wik minaman ngeeyimp piip God.antaman-a, ngampaniya ngangk minangam iiyimp God.antang a putha aak nungantamang wunimpa. Puth aak keenkanamana God.angan pam puungk wiy anangan waa thanangweya thanan wik nungantaman man-ngeeyina, nil wik inangan thaw:

“Ngayan man kul paththam wampangan thant a ngay inan kan-kanam thawāng ngay ke kaling thanang aak min ngatharamakana ya a.”

Nil nathpalman keenkanaman aak inan yumpa, a aak min nungantaman in kenyan yump, keenk

yump pam wanch al-alantan. Nilaniya kuup-kuup ngul thanta, puth thanana ke am iiyin aak min nungantamakana ya a.

<sup>4</sup> Lat ngench thayanangan thawana, “Nil piip God.ana kinch sixangana workan iyy-iiya, aak inan yump-yumpa. Ngaa thonang ngulan-a, nil kan-ngul work ke anangan nyiin-nyiin, aak min nungantamang, nilan puth work nungantaman kanam minchath.”

<sup>5-6</sup> Pam wanch anangan wik min God.antaman ka athaman ngeeyin-a, nil God.angan ke am kal thanang aak min nungantamakan. Than puth wikan ngeengk-ngeengkin, than min-minaman ke am ngaantam-ngeeyin ke-paal thanana aak min God.antamakan ke am iyy-iiyin, ya a. Nil God.an aak keenkanaman thaw, “Ngay ke kaling thanang aak min ngatharamakan, ya a.” Puth nil God.ana kaangka pam wanch aak min nungantamakan iiyayn, nil putha pam wanch wiy anangan ep kalow thanang aak min nungantamakan.

<sup>7</sup> A putha nil in-inman thaw-thawan ngampar. Wuut mangk ngamparam al-alangan wik ke aman ngeeyin God.antamana, yaa, thananiy-a, aak pintalang angman uth-uthamin. Amanamana, kaap yotang kanan want thanang-a, God.ana wuut mangk ngamparam David alantan thaw-thaw a nilaniya wik inangana lat ngench thayanangan ump-ump:

“Niiywey inman wik piip God.an ngeeyin nunang thaw-thawiy niiyant-a,  
yaa, niiyaniya kuchek thayanan ke iyy-iiyāna,  
niiy wik ngeeyān nunang paththama.”

<sup>8</sup> Nil pam Joshua.angan kal thanang wuut mangk ngamparam anangan aak min Canaan aakanakana, puth aak anan ya a ngampan ngangk aak umpuyaman wunāmp nungantang God.antangana – nil God.angan aak in kenyan kaa ngak ngampang. Nil ma -yotam anman thaw-thawan ngampar wampāmp nungant nil yipam kalow ngampang aak min nungantamakan.

<sup>9</sup> Puth ngampa pam wanch God.antamana aak nungantang wunāmp ngul, ngampaniya ngangk min wunāmp ke piip God.antan ngangk min wun work nungantaman kan-ngulan minchath.

<sup>10</sup> Ngamp aak God.antamak ngulan wampāmp-a, an ngampaniya ngangkang ngul thee āmp workama, ke nil God.an ngangkang thee work ke anangan ngul nyiinan.

<sup>11</sup> Ngampiya ke -ngoongkam anman woyan min wak-wakāmpa, ngamp tham yipama ngangk minang wunāmp aak piip God.antangan. Ngampiya wik min God.antaman ke ngeengkāmpa, ke than keenkanamana pam wanchang wik kaangk ke ngeeyayn piip God.antamana, a anpalman than aak min God.antamak ke am iiyin. Ngampaniya wik God.antaman ngeeyāmp paththama. Ngampwey wik ke an ngeeyimp God.antaman-a, puth ngampaniya aak min God.antamakana ke iiyimp, ya a.

*Wik God.antamana Ke Nhengk-Peempan Ongk Pepan Paththam Yimanangan*

<sup>12</sup> Nil God.an wik thawan ngampar-a, wik maal ya a, wik thayanam thaw-thawan ngampar, waa -waa an ngampar woyan want-wanttakan



ngangk minangaman iiyāmp nungantangan. Wik min God.antam anangana an ke nhengk-peempan ongk pep-pepanam wonk kuchamang yimanangan. Ke pamangweya nhengk-peempan pepanangweya pam thuiy-a, yaa, an puyam pek kemp pamantangan ngoonchan, yaa, wik piip God.antamana yimanangan pek ngangakang ngoonchan pam wanchantangan ngamp wik min nungantaman ngeeyanamp. Wik God.antaman ngangk ngamparang ngulan ngoonchan-a, an ngamp mee miy ngamp way anman yaaka ngaantam-ngeey-ngeeyanamp, nath ya a.

<sup>13</sup> Puth nil piip God.angan thath-thathan ngangk ngamparaman tham, ngampaniy putha ke -ngul mo imp nathan mee God.antaman, nil kan thathan ngampang yotam want-wanttakan iiy-iiyanampa a mee miy thampa ngamp ngeenan ngaantam-ngeeyanamp kuchek waap ngamparamangana. Ngampan aak wuthanangan ke ngoonchimp piip God.antamana ya a. Ngampiya mee nungantang iiy-iiyanamp wayan yumpanampa a putha minan yumpanamp. Ngul-ngulaniya ngamp yotamana um nungantang ngul than-thanāmp.

### *Nil Jesus.ana Ke Pam Pi an Priest Ngamparam Yimanangan*

<sup>14</sup> Ngampaniya Jesus.an puk nhengk God.antamana monkan-wak-wakanamp. Nilaniya kanam mat aak piip nungantam God.antamakana, a nil thaa -pant anman thaw-thawan ngamparam piip-kunch God.antan nil ke yipam wayathow ngampang, an niliya ke pam

pi an priest ngamparam yimanangan. Yaa, puth ngampaniya Jesus.an ke wantāmpana, woyan min nungantam anman wak-wakāmp.

<sup>15</sup> Nil ngangk maman ngampang, puth nilan mee miy ngampang, ngamp pam wanch karangk ya a, ngamp micha. Puth nilan aak ingman thamp wun-wuna, ke ngamp yimanangan aak inman wun-wunanamp. Oony wayangana a putha pam wanchanga thaach-thaachin nunang way yot wiy-wiyam thakan yumpowa ke than pam wanch wiyangan thaachantan ngampang way yot wiy-wiyam thakan yumpanakana – puth nil Jesus.angana way ke am yump ya paththam.

<sup>16</sup> Nil Jesus.ana anman God.antang, yaa, ngampaniya ke winyonyang mo āmp, ngamp thintham wampāmp nungant, a ngangk thayanam wik thawāmp nungant. Nil puth pam min thayan paththam, puth ngampan ep mich pongam iyanamp. Nilam thonamang ep ngangk thayanathiy ngampang. Than wiyangan thaachayn niyangan way yumpanakan-a, nil ngul ma-aathow niyang a niyana aak thaampān, way anangan ke yumpāna.

## 5

<sup>1</sup> Aak keenkanaman-a, than pam priests iyy-iyyin, than work iyy-iyyin aak ngench thayanan pi-pi in, aak Jews.antam angana. Nil pam thonamana moom pi an paththam iyy-iyy thanttaman, puth nilana work iyy-iyy pam wanch al-alantan. Nil piip God.angan work inan thee nungant. Than pam wanchangan minh may thakan wampathin

God.antan. Nil puth pam priest alangan chaapar minh al-alantamana a putha may wiy anangan aak ngench thayan aakanakan kal, thee ow nungant God.antan, nilan yipam piip God.angan ke -ngul ngaantam-ngeeyow way thanan yump-yumpin.

<sup>2</sup> Nil pam pi an priest ilanganiya mee miy nungantakam nil pam thayan ya weya, nil thamana micha, puth nanpalan nil ngangk maman thanang, pam wanch wiy anangan than ke an mee miy woyan min piip God.antamana, puth thanan woyan way anman wak-wakantan.

<sup>3</sup> Puth nil pam priest thampana pam thayan ya a, nil mich, nil nanpalan may minh thakana thee ow piip God.antan, nil yipam God.angana ke -ngul ngaantam-ngeeyow way nilam thampan yumpa, a putha pam wanchangan thamp way yumpin.

<sup>4</sup> A niy inan ngeeyān thampa: nil pamangana ke mi iy nungamang pam pi an priestan iiyow, ya a. Nilam thonakam God.angan mi iy work iikanakan, ke nil keenkan pam Aaron.an mi nunang workan iiyow nungant.

<sup>5</sup> A putha Christ.ang thampana ke am mi nungamang pam pi an priestan iiyow ngampar, ya a, nil piip nungantam God.ang thonakam mi nunang a pam wuut pi an paththam yump nunang ngul. A nil God.an thaw ngul, “Nint nhengk ngatharama.

Ngay nintang inman mi ang moom pi anan iiyān.”

<sup>6</sup> A putha wik thon inangan thaw nungant, “Nintiya priesta aak umpuyam iiy-iiyān ke pam anan Melchizedek.an.”

Wik yimanangan lat ngench thayanangan waa - waa ina.

<sup>7</sup> A putha ngay in thampan waa ang niiyanta: nil Jesus.an aak ingan wun-wun-a, nilan thaa - mamanang thaw-thaw nungant piip-kunchantan ke kuchow nunang uthamanakan, nil mee peeyanang thaw nungant, mee kam ukanang. Nilan puth mee miy piip nungantaman Goda wuut pi an paththam, kaangk nilwey kaa - piichanathiy nunang mulaman-a, an epa kaa - piichanathiy nunang, puth ya a. Nil God.angan wik ngeey nungantam a ngangk thayanath nunang, nil yipam ke an winynyang mo ow mulamana. Nil puth wik Jesus.antaman ngeeya, nil puth Jesus.an puk nungantam thaa - thayan ya a, nil wik erkamim ngeey piip nungantaman.

<sup>8</sup> Than pam wanchangan way anman ke - ngoongkam yump-yumpin nungant, puth nil Christ alangana wik God.antamana kan-kanam paththam kuyam ngeey-ngeey. Nungkway nil nhengk God.antaman-a, nil God.angan ke am weekan than pam al-alangan wayan yump-yumpin nungant, nil puth nhengk nungantam aak mak thaampow, nil yipam piip-kunchantam anman wik ngeey-ngeeyow.

<sup>9</sup> A nil kan-kanaman pam min paththaman iiy-iiyana, yaa, nanpalana pam ilangaman Christ.angana kaa - piichanathow ngampang a yalmathow ngampang koyam God.antan, ngampan yipama ngangk aak umpuyam wunāmp aak min nungantang angan. Nil pam wanch anangan ngulakaman kaa - piichanathow thanang wik nungantaman ngeeyantan.

<sup>10</sup> Nil puth piip-kunch God.angana pam pi an priest waa an, ke pam anan Melchizedek.an.

*Ngampaniya Woyan Min Anman Ke-Ngoongkam Wak-Wakāmpa*

<sup>11</sup> Ngay inan kaangk putham waa āng niyantaniya, puth ngay want-wanttakan wik engk-engkanangan waa ing niyant, niy puth kuchek thinhanweya, ke yippak minam ngaantam-ngeeyaniy ya a.

<sup>12</sup> Puth niyiya Christians nathpalman iyy-iyyan, an niyaniy putha wik min God.antamana thaa -aathin thanang wiy anangana puth ya a, niy ke am thaa -aathaniy thanang. Niiyaniya ke puk many thaa -paapiy weenan, niy puth wik manyam anman thiichan. Than wiyangan putham mak thaa -aathayn niyang, wik anangan thaa -aathayn niyang niy keenkanaman ngeeyana. Puth niyan ke thuut kaath pi anantam yaam mungk-mungkaniya, ke may minh thayan ke yippakan mungkaniy yimanangana.

<sup>13</sup> Pam wanch anangan ke puk many thaa -paapiyan iyy-iyyantan-a, thaniya ke -ke am minam thiichantan yippak woyan min piip God.antamana ya a, an than ke pam wanchakam ke am emin yimanangan.

<sup>14</sup> Puth than pam wanch wiy anangana eppaththam minan ngaantam-ngeeyantan an than ke pam wanch kanam emin than may minh thayan ngul mungkantan, ke thuutana ke am ngul mungkantan. Thananiya woyan min anan wakantan, a minam ngaantam-ngeeyantan thama a putha thiichantan woyan

min God.antam wanttakan wuna, thanana ke-paal ngaantam-ngeeyantan minan yumpantan-a, putha wayan yumpantan, puth thananiya min yumpanakan mi antan ngul.

## 6

1-3 Yaa, puth ngampaniya woyan min anan ke-ngoongkam anman wak-wakāmp. Ngamp yaam ke weenth-weenthāmāmp ke puk manyiy yimanangan iyy-iyyāmp, ngampiya ke pam wanch pi-pi anam iyyāmpa, a minam anman ngaantam-ngeeyāmp. Kanak ngamp ka athaman ngangk ngamparaman thee amp nungant Christ.anta, a puth woyan wayan kanaman wantamp, puth ngamp wik ma mangkam God.antam ke am yippak thiichamp, puungkwiy thonakam epa ngamp mee miy. Ngamp puth kan mee miy nil Christ.ang wanttakan ngangk ngamparaman pachathana, a puth ngamp mee miy nil Ngeen-Wiy Min God.antaman ngangk ngamparamang kanaman ngoonch. Than puth Christians wiyangan kootra ngamparaman kanaman ngakangan kuungkw-kuungkin, an yipam meenathow nil God.ana way ngamparam anangan kanaman kon-ngathan. Than ma kuchek ngamparamangan wunpina, an meenathow nil Ngeen-Wiy Min God.antaman ngangk ngamparamangan kanaman ngoonch. A ngamp mee miy an ngul-ngulana, nil God.angan pam wanch mul anangan koyam ngulan ekathow thanangan, a nilan pam wanch wiy anangan kuchow thanang aak nungantam anpalan aak way aakanakan. Yaa, ngampana wik inangan ep

kan-ngul mee miy a puth kan ngeeyamp thamp. Puthaman ke -ngul waa iythan ngampar, ya a. Ngampan puth wik God.antaman min-min ke am yippak thiichampa. Puth wik nungantam wiy-wiy thonakam thiichampa. Yaa, puth ngampiya woyan min God.antam anman ke -ngoongkam wak-wakāmp a wik nungantam anman ngeey-ngeeyāmp yipam min-min ngulan thiichāmp. Nil God.angan ngampang ma -aathiywey-a, yaa, ngampaniya woyan min anman wak-wakimp. Nilan puth kan-kanam kaangk ma -aathow ngampang.

<sup>4</sup> Nil puth God.angan woyan min nungantaman kan kal ngampang a puth ngampan kan thiichamp nunanga, a puth nilan ngangk minangam iyy-iiyan ngampara, nilan puth Ngeen-Wiy Min nungantaman kuchan yipam ngangk ngamparamangan wunow.

<sup>5</sup> A puth ngamp wik nungantaman kan mee miya, wik min paththamana, a nilan puth ma -aathan ngampang yipam work minaman iyyāmp nungantan, a work pi -pi anaman yipam meenathāmp thant.

<sup>6</sup> Ngamp woyan nungantaman wantimpwey-a, a oony wayan monkan-wak-wakimpanwey-a, an ke ngampaniy nhengk God.antaman putham yuk wuuyanang waanch-waanchanamp nunang yipam than wiyangan thaa -thengkathayn nunangan. Puth amanam ngulan-a, nil wee ang koyam ngulaniy weentathow ngampang woyan min God.antam aakanakana? An ya a!

<sup>7-8</sup> Niiy kan in ngeeyāna: than farmers.angan may kaanch aakanan kaampantana. Ngakan-

gan epan-a, aakan yiinchathan, a may min ngul emantan thant pam wanchantan. Puth aak wiy ananganiya way thayana, yuk waakam a puth keekach thakana emantan aak anganiy. Yaa, nil piip God.angana aak way ngul waa an, a thumang ngul kiingkow. Ngamp pam wanch wiyiya, ke aak ngaanh min yimanangan iiyanamp a nil God.an ngangk min wunan ngamparaman. Puth ngamp pam wanch wiy ananganiya ke aak ngaanh way yimanangan iiyanamp, a nil puth God.an ngangk way wunan ngamparaman. Ngamp way anman iiy-iiyimpwey-a, yaa, puth nil God.angan yaaka konchow ngampang a puth wayathow ngampang.

<sup>9</sup> Puth niiyiya, ngurp ngatharama, nungkway ngay wik thayan thawangan niyant-a, ngay puth ngangk way ke am wunang niyantama. Ngay puth kan mee miy niyantam, niy woyan min God.antaman wak-wakaniy, a nilan minam ngul iiy-iiyow niyant a kalow niyang niyan yipam nungantang aak umpuyam wunān.

<sup>10</sup> Nil God.an min paththama. An work min niyantaman ke kon-ngathow nunang. Nil kan mee miy niy kaangkan wunaniy thant Christians wiyantan, a puth niyan ma-aathan thanang thaka, a puth niy in-inman ma an-aath-aathaniy thanangwey.

<sup>11</sup> Ngan kaangk niyan anman wik God.antaman ngangkangam pi-pi ān aak-aakanakaman nil Christ palam ngulan wampow aak iikanakan. Nil puth kaniy thaw ngampara, nilan kalow ngampang aak nungantamakan. Niiyan puth ke man ngeeyān nunang.



12 Niiy tham ke eenchān woyan min God.antam anpalan. Than pam wanch wiyangan God nunang ngangkang pi-pi antan nunang a puth woyan nungantam anman wak-wakantan, ke-ngoongkam anman ngangk minangam kuup-kuupantan nungant nilam puth kaa ngak thanang minaman iiyow thant. A puth nil God.an kan-kanam minam iiy-iiyan thant ke nilaman kaa ngak thanang. Yaa, puth niiyaniy woyan thanttam anman wakān.

*Wik Nil God.an Thawana An Kan-Kanam Thawan*

13 Aak keenkanamana nil Abraham.an man-yethaman yippak-a, aak thantan yimanangan wuna. Nil pamangwey kan-kanaman kaangk pam thonan kaa ngakow-a, yaa, an nilan um pam moom pi anantang wik yumpan. Nilamwey kaa ngakiya, yaa, puth nilan wikan pi ow nil ngeenakan kaa ngak, a nil ke wik uuyamow. Yaa, nil puth God.angan kaangk Abraham.an kaa ngakowana, puth nil wee a pam pi an ke God yimanangana, ya paththama. Nil puth God.angan namp nungantakaman waa, a Abraham.an kaa ngakan.

14 Nilaniy thawa, “Ngay Goda. Ngay nintang inan kaa ngakanga. Ngay kan-kanam nintang min-minakam ngul pi-pi āng nintanga. Nintiya wuut mangk thanttam pam wanch thaa-wantanamantam iiyāna.”

15 Nil puth Abraham.angan ke am God.an nunang man-ngeeyan ya a. Nil anman wik God.antaman kan-kanam ngaantam-ngeey-ngeey, a nilana kuup-kuup. Ngul-ngulana wanch

thum nungantamangana puk wuut ngul kal. A ngul anpalaniya, nil Abraham.an pam wuut mangk pam wanch thaa -wantanamantam ngul ween ke nilam God.angan kaa ngakan.

<sup>16</sup> Aak keenkanamana, than pam wanchangan kan-kanaman kaangk kaa ngakwaynwey-a, yaa, thananiya, mee pam pi an alantangan kaa ngakwayn. Nath pam kuchamwey thaa thay-thayanamiypulweya. A pul nath kaangk kulan wantowpulwey-a, yaa, pulaniya, wik thayan yumpiypula, um pam moom pi an alantangana. Anpalana, an pul kan-ngul ngaantam-ngeeyiypul pulantakamana pul kan-kanaman wik thayanan yumppul. Puth aak thantan keenkanaman yimanangan wuna.

<sup>17</sup> Nil God.angan kaangk pam wanch nungantamangan ngaantam-ngeeyāmpān nil ke aman wik uuyaman ya a. Nil anman man-thonam wik pi an. Nilan puth nanpalan namp nungantakaman waa yipam than pam wanchang ngaantam-ngeeyayn wik nungantam kan-kanaman. Nil wik inangan kaa ngak, “Ngaya, Goda. Ngay wik ngatharaman kan-kanam ngul pi ānga.” Nil yimanangan meenath ngampar pam wanch nungantamakan wik nungantam kan-kanaman. Nil kan-kanam paththam wik nungantaman ke epankathiy.

<sup>18</sup> Nil God.ana wuut pi an paththama. A wik nungantam anangana kan-kanama, a puth nil ngeen nathan kaa ngakan-a, an nil wik thon ke thawiy ya a. Nil ke wik uuyaman. Puth nanpalana, ngampaniya ngangk thayanam ngul iiyanamp. Nilan thawana nil ngul kalow ngampang nungantakama. A puth ngampiya wik

inangan ngangk ngamparamang pi-pi āmp. Wik God.antam nilan thaw-a, kalow ngampang aak min nungantamakan-a,

<sup>19</sup> wik inangan ke anchor min anangan, mich ya a, thayan paththam anman wun-wunan aak ngakang nath pekan ke -paal chukkunana ke wochiy ngakangan, ya. Wik nungantam anangana ke anchor anman thayan aak in keny heavenangan God.antang, ngampam yipama ke thechāmp God.antamana, nilan puth ma -thayanam pi-pi an ngampang, ke kuchiy ngampang ya a.

<sup>20</sup> Nil Jesus.ana keenk iiy piip-kunch God.ant, ngampaniya koy-koyuw iiyāmp God.antan mangk nungantang. Niliya moom pi an ngamparam priesta iiy-iyan. Nilaniy ke Melchizedeka, pam wuut pi an paththam aak umpuyam iiy-iy.

## 7

### *Nil Pam Melchizedek.ana Priest Iiy-Iiy God.antana*

<sup>1</sup> Aak keenkanamana nil pam Melchizedek.ana pam pi an king iiy-iy aak namp Salem angana. Niliya priest thamp iiy-iy God.antana, moom wuut pi an paththam. Aak an-aniyangana, Abraham wee anangana a puth kings a soldiers thantam anangana than pek-pekwin, a piik-piikwin thanttakam. Than Abraham wee anangana mulmulakaman piik-piikin thanang a anpalaniya, than kan-ngul iyyin koyam aak thanttamakan. Woyan ompamangan-a, nil Melchizedek.angana

uw nunang Abraham.an. A nil thawant Abraham.antan, “Ngay kaangk nil God.an min anman iiy-iiyow nungkar a ma -aath-aathow nintang.”

<sup>2</sup> Nil Abraham.angana yuk way min yot kal thanttam aak nungantamakan pam pi-anam kings wiy al-alantamana. A nilana yuk way min puungk wiyana nungant thee Melchizedek.antan. Namp inan Melchizedek.ana yimanangan wuna pam pi-an kinga min paththamana. A putha thanan waa in nunangweya king mina, pam wanch minaman ma -aath-aathan thanang ngangk minangaman iiy-iiyayn thanntakamana. Puth aak nilan pi-pi-a, Salem.ana, aak namp inana yimanangan wuna “aak enyana.”

<sup>3</sup> Wuut mangk Melchizedek.antamana an weenathath? A putha kaath piip nungantamana weenathathwepula? Puth lat ngench thayanangan ke am waa an ngampar ya a. Nil aak ngeen nath aak-ngeeya? A putha nil aak ngeen nath uthame? Puth lat ngench thayanangana ke am waa an ngampar ya a. An nil ke priest anman iiy-iiyow aak umpuyama; ke nil puk nhengk God.antamana yimanangan iiy-iiyana.

<sup>4</sup> Nil pam Melchizedek.ana pam nil pi-an paththama. Nungkway pam Abraham.ana wuut mangk pam wanch God.antamakaan-a, nil Melchizedek.angana ke am way minan thee nungant Abraham.antan, ya a, nil Abraham.angana ep way min thee nungant Melchizedek.antan. Puth nil Melchizedek.ana pam pi-an paththama, Abraham.ana ya pam manya.

<sup>5</sup> Aak keenkanamana nil Moses.angana wik thayan God.antamana want thant Jews.anta. Nilan thawa pam Jews al-alangana way min thee - thee ayn pam pi an priests al-alantana. Pam priest ananganij Jews thamp iyyinwey. Pam wanch Jews al-alantana wuut mangk thonam anman thantwey Abraham.an. Nil pam Levi.ana puk nhengk Jacob.antamana niliya wuut mangk ilantaman wampa. Nil pam inan Levi.ana wuut mangk thanttam pam priests ma mangkamantam Jews.antaman. Puk nhengk wiy anangan Jacob.antamana ke iyy-iyyiyan priestana ya a.

<sup>6</sup> Puth nungkway nil Melchizedek.ana wuut mangk Levi alantaman ke am wamp-a, nil Abraham.angana way min ep thee ant. A anpalan-a, nil Melchizedek.ana wik min inangaman thawantwey Abraham.antan, “Ngay कांग्к piip God.an min iyy-iyyow nungkar.” Nil piip God.an ka athaman thawant Abraham alantana, nilaniya wuut mangk pam wanch yot thaa -wantanamantam weenowa, puth nil Melchizedek.ana ep pam wuut pi an paththam, nil Abraham.an ya a.

<sup>7</sup> Yaa, an puth ngampaniya mee miy ngula, pam ilantamana Melchizedek.ana wuut pi an paththam, nil Abraham.ana ya a, nil puth wik min anangan thaw nungant, nil Abraham.an ep ke am wik min thawa Melchizedek.antana.

<sup>8</sup> Than pam wanch Jews al-alangana way min may thakan thee -thee in pam priests al-alantan. Puth nil Abraham.angana way minan Melchizedek.antan thee. Puth lat ngench thayanangan waa ana nil Melchizedek.ana in-

inman man-yetham anman iyy-iyyan, puth than priests anangan ep ya a, kanam uth-uthamin.

<sup>9-10</sup> A putha niyy in ngeeyāna; nil Abraham.ana wuut mangk Levi alantamana a putha pam priests ma mangkam al-alantamana. Than pam wanchangan way min thant pam priests al-alantan thee -thee in. Nil puth Abraham.angan way min nungant Melchizedek.antan thee -a, an ke than priests ma mangkam al-alangan way minan thee -thee in nungant Melchizedek.antan nil puth Abraham.ana wuut mangk thanttama.

*Nil Piip God.angana Pam Priest Thonangan Ngul Kuch Ngampar, Christ.ana*

<sup>11</sup> Nil pam Levi.ana wuut mangk thanttama, Moses a Aaron wee anang thanttam a putha thanttam priests wiy al-alantam thamp. Nil Moses alangana wik thayan God.antum want ngampar. Puth than priests al-alangan wik thayanan pam wanch anangan thaa -aath-aathin thanang. Puth than priests al-alangan ngul ngampang kaa -piichanathiythan ey? Ya a! A putha wik thayan alangan ngul ngampang kaa -piichanathiy ey? An ya a. Puth nanpalaan nil piip God.angana pam priest thonangan ngul kuch ngampar, Christ.ana, ke pam Melchizedek anman.

<sup>12-14</sup> Nil Jesus.an ep-paththam pam priest iyy-iyy, puth wuut mangk nungantamana Judaha, nil Levi.an ya a. Nil puth Moses alangan ke am waa kampan Judah.antum pam priestsan iyy-iyyayn, ya a. Thananiya ke am minhan kiingkin God.antan, yuk altar angan, ya a, pam kampan Levi alantamangana epa minh kiingkiingkin

altar angan piip God.antana. Puth nil piip God.angan kuch nunangan Jesus.an pam priest iiyow, nil puth ke priests wiy anangan ya a, nil priest wiy-wiyam iiy-iiy. Nanpalan-a, ngamp mee miy nil God.angan wik thayan keenkanaman wiy-wiyam yump. Yaa, ngamp yimanang ngulan-a, wik Jesus.antam ngeey-ngeeyāmpa, wik thayan keenkanaman ya a.

<sup>15</sup> Ngamp puth mee miy nil Christ.ana pam priest ke wiy anangan ya a, nil pam priest wiy-wiyama, nilaniya ke pam Melchizedek.ana.

<sup>16</sup> Wuut mangk Christ.antaman pam priests ke am iiyin, ya , puth nanpalan ke am nil Christ priestan iiy-iiya. Nilaniya priesta iiy-iiy nil puth mulaman thayan paththam koyam eka a man-yetham ngul wun-wunan aak umpuyam.

<sup>17</sup> Wik piip God.antaman lat ngench thayanangana waa an ngampar Christ.antaman. Nil God.an thawa nungant Christ.antan pam pi an priestan iiyow aak umpuyam, ke nil anman Melchizedek.ana.

<sup>18</sup> Nil Christ kanan wamp-a, nil piip God.an thawa than pam priests anangana ke -ngul work iiy-iiyayn nungant ya a, puth thananiya ke kaa -piichanathiythan pam wanch anangan, ya a. Puth namanaman nil piip God.angan wik thayan priests al-alantaman epankath thanntam.

<sup>19</sup> Nil piip God.an thawa pam thon alangan epaththama Christ.angan kaa -piichanathow pam wanchana a putha ma -aathow thanang thampa, thananiya yipam ke -ngul waank thechayn nungantam God.antamana, ya a, puth thintham wampayn nungant.

<sup>20-21</sup> Nil piip God.an wik thayanam thaw nungant Jesus.antana,

“Ngay in kan-kanam thawang nungk,

ngay ke -ngul wik thon ngulan epankathinga, ya a.

Nintiya pam pi an priest aak umpuyam iyy-iiyān.”

Nil piip-kunch God.ana wik yimanangan thaw nungant Jesus.antan, puth nil pam priests wiy alalantana ke am wik yimanangan thaw, ya a.

<sup>22</sup> Puth nil God.ana kan-kanam Jesus.antan thaw nilan priest pi an ngamparaman iyyow aak umpuyaman, a puth thaa-pant thaw-thawow ngamparamweya, puth nanpalan ngamp mee miy nil God.angan wik min inan ngul pi ow. Nilan puth ngampang kaa ngak ngamp nungantang aak umpuyaman wunāmp.

*Nil Jesus.ana Ke Uthamiya, Ya a, Nilam Anman Priest Min Paththam Iiy-Iiyan Ngampar*

<sup>23</sup> A putha thon inan waa āng niyant: pam priests anangana ke am man-yetham aak umpuyam wun-wunin ya a, than uth-uthaminweya. Pam priests yot workan iyy-iiyina, puth thananiya uth-uthamin ngul.

<sup>24</sup> Puth nil Jesus.ana ke uthamiya ya a. Than wiy ngulan priest ke iyy-iiyiythana ngampar ya -ngula, nil Jesus anman priest ngamparan iyy-iiyow.

<sup>25</sup> Yaa, puth nanpalana, nil Jesus.angan kan-kanam kaa -piichanathiy ngampang, in-inman-a, a ngulakam, than wee -wee anangan ngangkan thee ayn nungantan, a wampayn nungant God.antan-a, an nil ep kaa -piichanathow



thanang. Nil puth Jesus.an aak umpuyam man-yetham iyy-iiyan a thaa -pant thaw-thawan ngamparam piip-kunch God.antan, nil ke yipam wayathow ngampang, nil thaw-thawan piip-kunchantan ngangk mamow ngampang a putha ma -aathow ngampanga.

<sup>26</sup> Nil Jesus anman pam mina, nil ke am way thakan ngaantam-ngeeyan, ya a, nil pam way ke am iyy-iiy ya a. Nil ke ngamp yimanangan ya way yumpanampa putha wayan iyy-iiyanamp, nil ep pam min paththam anmana. Nil Jesus.aniya anam keny ngul wun-wunan piip-kunchantang. Niliya priest wuut pi an paththam ngampara.

<sup>27</sup> Ngaa thon-thonana, nil Jesus.angan minh ke am kiingk-kiingkan, ya a. Than pam priests yot al-alangana ep-paththam minh thumang kiingk-kiingkin — ka athaman-a, thanttakam kiingkin way anpalan thanan yumpin, amanaman-a, pam wanch wiy al-alantan ngul kiingkin, way anpalan thanan yumpin. Puth nil Jesus.ang thonakamiya ke amim way yump, ya a. Nil utham ngampar yuk wuuyanangana puth ngamp pam wanch way iyy-iiyamp, nil putha ke -ngul uthamiya, ya a. Nil ma -thonam theetath nungamang, ma -yotaman ya a.

<sup>28</sup> Keenkanamaniya, piip God.angan wik thayan anangan waa nungant Moses alantan. Anpalana nil Moses.ang pam wiy al-alantan work inan thee thant priestsan iyy-iiyayn. Puth wiyiya, pam priests al-alangan wayim yump-yumpina, than pam min ya a. Ngul-ngulana, nil piip God.ana putham ngul wik thayanam thaw, puk nhengk nungantamana pam pi an priest anman ngul iyy-iiyow. Puth nilan way ke am yump ya a, nil

anman pam min-minam paththam iyy-iiyow aak umpuyama.

## 8

### *Nil Christ.ana Priest Pi an Ngampar Aak In Kenyana*

<sup>1</sup> Niiy min-min wik inan ngeeyāna, ngay wik engkanang umpāng niiyant: nil Jesus pam priest wuut pi an ngampar in keny aak achantang piip-kunchantang God.antang wunana, aak min paththamangan. Pulan moom pi an karpam iyy-iiyanpul,

<sup>2</sup> aak in kenyan wun-wunanpul, aak min paththam an keny pulant nil God.angan yump, pamang ya a.

<sup>3</sup> Aak inganiya ngampan wunanamp-a, than pam pi -pi anam priests al-alangan minh kiingkiingkin piip God.anta a puth way min thamp wamp-wampathin nunganta puth God.angan work inan thee thant priests al-alantan. Nil puth Jesus.an priest tham, nil puth minh thakan ke am thee nungant, nil nungamang ep theetath.

<sup>4</sup> Nilwey Jesus aak ing pek yippakan wun-wuniywey-a, nilan priest ke iyy-iiyiya, puth than priests yot wun-wuntan aak inganiya, wik thayan Moses.antaman pi -pi antan, puth may minh thakan wamp-wampathantan nungant God.antan.

<sup>5</sup> Nil ke pam Moses alangan aawuch ngench thayanan kaachiy aak ing pekan-a, earthangan-a, nil piip God.an thaw nungant, “Ngay aawuch maanyan kanam meenathangan nungkara aak yoykang angana. Yaa, nintaniya

yimanangan kaachān aawuch ngenchaniy, tabernacle.an, ke ngayaman meenathangan nungkara.” Ngampaniy priests anangan thathāmp thanangan-a, work an pekan iiy-iiyantān aawuch ngench thayanang angan-a, a ngampaniya ngaantam-ngeeyāmp aak ngench thayan God.antam in kenyaana – puth tabernacle ngench thayan keenkan yumpin aak ingan-a, an ke maanyang meenathan aak ngench thayan paththamana aak in kenya, aak heavenana. Puth than pam priests anangana ke am work iiy-iiyantān aak ang kenyaana ya a. Nil pam thonam priest iiy-iiyan Christ anman aak in kenyan.

<sup>6</sup> Nil Christ.ana priest min paththam iiy-iiyan, than priests wiy anangan work chil way iiy-iiyantān. Puth inan thamp, nil Jesus.angan wik God.antam wampath pam wanchant. Wik God.antaman min paththama, an ke wik thayan keenkanam yimanangan ya a. Wik thayan keenkanam alangan pam wanch ke kaa-piichanathiy ya a. Puth wik thayan God.antam nyiinganam inan ep paththam mina. Nil pamangwey wik God.antam nyiinganaman ngeeyiywey-a, yaa, nil God.angan kan-kanam ngul kaa-piichanathowan, ke nilaman kaa ngak, a nilan ngul kalowan nungantangan wunow aak umpuyaman.

<sup>7</sup> Wik thayan keenkanam alanganweya kaa-piichanathiy pam wanchwey-a, yaa, an puth nil Jesus.ana ke ukiy aak anpal kenyan aak iikanakan ngamparwey ya a.

<sup>8</sup> Than pam wanch anangan keenkanaman wunin-a, wik thayan God.antaman ke aman

ngeeyina a putha ke aman pi in, nil God.an  
nanpalan wik inangan thaw pam wanch  
nungantam al-alantan lat ngench thayanangan:

“Niiy in ngeeyāna, ngay wik nyiingkanaman  
min paththam kaa ngakāng niiyang  
ma mangkam Jews inangan mal kungkan  
wunaniya aak Judah.angan

a putha mal yiipan wunaniya, aak Israel.angan.

<sup>9</sup> Wik anangan ngayan keenkanaman waa angan  
thant wuut mangk niiyantamakana – wik  
anangan ya a,

ngay wik nyiingkanaman kaa ngakāng niiyang.

Ngayana wuut mangk niiyantam kalangan  
thanang aak Egypt.am anpalan.

A ngayaniya wik ngatharam anangan waa -  
waa angan thanta,

puth thananiya wik ngatharamana ke am ngeey-  
ngeeyin ya a, wik ngeengk-ngeengkin  
ngayang,

yaa, ngayaniya too wantangan thanang, ke am  
ngul ngaantam-ngeeyangan thanang ya a.

<sup>10</sup> Puth ngay kan-ngul wik nyiingkanaman  
waa āng niiyantweya, niiy wik in ngeeyāna:

‘Aakan ngul wampowa than pam wanch Jews  
anangan palaman wampayn ngathar.

Aak an-aniyangana ngayan thaw-thawāng thant

a wik ngatharam ngangakang ngul ngoonchow  
thanttang,

a than woyan min ngatharaman wak-wakayn  
ngul.

Ngayaniya God thanttam ngul iiyāng, thananiya  
pam wanch ngatharam ngul iiy-iiyayna.’

- 11 Thananiya ke -ngul thawiythan pam wanch wiy al-alantana,  
 ‘Niiy piip God.an kan-kanang thiichān nunanga.’  
 Puth ma mangkamangan ngul thiichayn ngayanga –  
 wuut manth-thayan al-alangana putha puk manyiy al-alangan thampa thiichayn ngayanga,  
 pam wanch pi-pi anama putha pam wanch kaangk-ke anang al-alangan thamp,  
 than yotamang ngul thiichayn ngayang, ngay God thanttamana.
- 12 Ngay ngangk mamāng thanangweya,  
 a putha ngayaniya ke -ngul ngaantam-ngeeyāng way thanan yump-yumpina, ya a, an kongathowany ngula.”
- 13 Nil piip God.angan wik nyiinganam inangan waa ngamparweya, puth nanpalaan wik thayan keenkanamana min ya -ngulwey ngampar. A work thanttam priests al-alantamana min ya -ngul ngampar thampa. Aak woyan thanan wakina, yip-yipam minchow.

## 9

### *Keenkanaman-a, nil God.an Thaw Thant Aak Ke Ngorkal Yimanangan Yumpayn Nungant*

<sup>1</sup> Aak keenkanaman-a, piip God.angan wik yump thanttang, pam wanch Jews al-alantangan. Nilan thaw thant aak ngorkalan yumpayn nungant, tabernacle.ana waa antan. A putha nil piip God.an thaw thant than want-wanttakan mee -wuthanamayn nungant a thaa -kuumpayn nunang thak aak angan tabernacle.angan.

<sup>2</sup> Aak inan tabernacle.an-a, ke tent pi an yimanangan, a aak pekana we ar, aak room kucham thamp, a thaa thonam yumpin pentanakan um kaawa. A aak room wonk kaawangkana, an aak ngench thayan waa in. Aak room angana, wonk yiipangkan-a, yuk candles thum thamp than-thanin, a putha table than-than angman kungkangka. A may bread manch ke may palow yimanangan table.ang wun-wunin.

<sup>3</sup> Aak tabernacle.ang pekana, than yuk curtain waanchin menh-menhangana yipam room kucham wunow. Room thonamany-a, wonk kuuwangkana, anany waa ina aak ngench thayan paththaman.

<sup>4</sup> Aak anganiy-a, bowl thaa we ar wun-wun goldaman yumpin, than priestangan opar awal min kiingk-kiingkin yuk bowl angan piip God.antan a putha yuk box angman than-than than pam wanchangan yipam ngaantamngeeyayn wik anana nil piip God.angan kaa ngak thanang. A yuk boxan-a, yuk goldangam kang. A box ang pekan-a, yuk jar wun-wun goldaman yumpin, yuk jarangan-a, may manna wun-wun. (May inaniya nil piip God.angan kuyam kuch-kuch thant pam wanch Jews al-alantan, than may ke anangan wunina, may manna inan God.angan kuch-kuch thant inpal kenyan, than aak pintalangan wun-wunin.) Yuk box anganiy-a, yuk pil thook Aaron.antaman thamp wun-wun, yuk angana kangk yiikan manyiy pent-pentin. A putha yuk box anganiy-a, kunttow manch kucham thamp wun-wunpul. Nil piip God.angan ka athaman wik thayan Ten Commandments

anangan ump kunttow manch al-alantangana.

<sup>5</sup> Box kenyangk angana ngaantiyongk kucham than-thanpul pamang yumpin, pam wanchangan yipam ngaantam-ngeeyayn nil God.an thanttang wun-wunan, a nil min-minam paththam, a wuut pi an paththam thamp. Punth-paam pulantamana we arathpul keny-kenyangk yuk boxangan. Than pam priests al-alangana chaapar minhantam anangan ma thethang mak-makin yuk boxan, nil piip God.angan yipam ke -ngul ngaantam-ngeeyow way thanan yump-yumpin pam wanchangana. Ngay kaangka wik yot waa -waa ing niyant aak tabernacle.aman, puth ya a, anman kana.

<sup>6</sup> Than aak tabernacle.an kanaman minchathina, ngaa thon-thonana pam priests anangana aakanakaman iiy-iiyin aak um kaawa, aak ngench aakanakan, a than work anman iiy-iiyin.

<sup>7</sup> Nilam thonakam pam pi an priest anman pekan ngoonchow aak um kuuwan aak ngench thayan paththam aakanakan, pam wiy-wiyan ya ke ngoonchiythan. Nil pam pi an priestana ma -yotamana ke am ngoonch-ngoonch aak ngench thayan paththam aakanakan ya a, nil kaap thonamangan wantow-a, an ep nil ngoonchow. Nilaniy kalowa minh bullockantam chaapara, a putha goat alantaman chaapar, a ma thethang makow yuk box kenyangk angan, nil piip God.angan yipam ke -ngul ngaantam-ngeeyow way nungantaman nilan yumpa, putha way pam wanchangan yump-yumpin thamp, an ke -ngul ngaantam-ngeeyow.

<sup>8</sup> Puth anpalana nil Ngeen-Wiy Min God.antam

alangan ma-aathan ngampang ngamp yipam minam ngaantam-ngeeyāmp tabernacle.ana. Aak room mal kaawangkana angman yippak wun-wunow tabernacle angman-a, nil thonam anman pam pi an priestana pekaniy ngoonch-ngooschow um kuuw, aak ngench thayan paththam aakanakan, pam wanch wiy anangan ya a, ke yippak ngoonchiythan.

<sup>9</sup> Yaa, ngamp puth inan mee miya: aak keenkanamana, pam wanch al-alangan yuk way min kalin nungant piip God.antan aak tabernacle.akan putha minh thakan kalin nungant a putha chaapar minh al-alantaman thampa. Nungkway chaapar thakan kalin-a, pam wanch al-alantaman ngangk ke am yippak pach wun chaapar minhantamangan an ya a, ngangk thanttamana ngotan yippak wun-wun thantwey mee piip God.antangan.

<sup>10</sup> Aak keenkanamana wik thayan God.antamanga waa ngampar may-a, a ngak thakan want-wanttinan mungkāmpa, puth ngampan want-wanttaka kempachathwump ngamparakamana, a putha way min thakan want-wanttak pachathāmp. Wik inangan-a, God.an thaw-a, kemp ngamparam inangan waa a, ngangk ngamparam ya a. Keenkanaman-a, nil piip God.an thaw pam wanchantan wik thayan inangan minam pi -pi āna aak-aakanakaman nil Christ.an palaman wampow aak iikanakan.

*Nil Christ.an Wamp Nil Yipam Woyan Min Paththam Meenathow Ngampar*



11 Nil Christ.an wamp ngampar nil yipam pam priest pi an iyyow a woyan min paththam meenathow ngampar woyan min piip God.antamana. Nil ke am work iiy-iyan aak tabernacle.angan pamangan yumpin aak ingana, ya a. Nil Christ.ana pam priest pi an ngampar, nil in keny work iiy-iyan ngampar, aak tabernacle in kenyaana, work min-minam paththam iiy-iyan.

12 Nil Christ.ana ke priests wiy yimanangan ya a, niliya an nil-nil, priest min paththam. Nil kaap thon-thonana, ke am kal-kalan chaapar minh goatsantaman putha chaapar calvesantaman piip nungantamakan, ya a. Nilaniya chaapar nungantam anman thee piip-kunchantan God.anta, puth ma -yotaman ya a, nil ma -thonam anman kan theetath nungamang way ngamparamakan utham yuk wuuyanangan ngamparweya, a nil anpalaniya koyam ngul mat aak ngench thayan paththam aakanakan aak in kenyan, a anman wun-wunan ngul, puth nilaniya kaa-piichanath ngampang way ngamparam amanaman, ngamp ke yipam ngul-nyaa wunāmp mee piip God.antangan, a ngampaniya yipam aak umpuyangam wunāmp nungantang.

13 Yaa, wik thayan keenkanamana yimanan-gan wun thant: pam wanch wee an kemp pach ke aman iiy-iiyin mee God.antangan-a, yaa, puth wik thayan keenkanaman thawa pam priest alan-gan chaapar minhantaman ma thethang mak-makow thanang minh goatsantama puth bull-santam alangan, a putha thum kurk minh calf thumangan pench-pench-a, alangan thampa ma thethang mak-makow thanang — a amanamana

thanan ke kemp pach ngul iiyaynweya.

<sup>14</sup> Puth in ngeeyāmpa: chaapar Christ.antamana an nil-nil, min paththam. Pam Christ anana min-minam paththam nilaniya, way ke am yump, ya a. Nil Ngeen-Wiy Min piip God.antamana, ngangk ngulakam wun-wunow man-yethamana, nilaniy-a, ma -aatha nunang, a putha ngangk thayanath nunang, nil nungamang yipam thee-tathow piip God.anta uthamow yuk wuuyanangan way ngamparamakan. Puth ngampaniya waank thech-thechanamp piip God.antaman ke -paal Christ.an utham ngampar, chaapar nungantam alangana ep pachathiy ngangk ngamparaman. Puth anpalaniya ngampaniya ke -ngul yipam yaaman ngul-nyaa an ngeechanamp way ngamparam amanamana ngamp keenkan yump-yumpamp, ngampaniya ngangk minangam ngul iiy-iiyāmp piip God.antangan a putha wik ngeey-geeyāmp nunang.

<sup>15</sup> Nil Christ.angan wik God.antam nyiingkanaman wampath. Nil wikan wampath yipam pam wanchangan ngeeyayn a monkan ngul wakayn nunang. Ngamp pam wanchangan Jesus.wey monkan-wakimp nunangan-a, ngampaniya aak umpuyam man-yetham ngul iiy-iiyāmp nungantang ke God.angan kaa ngak. Wik nyiingkanam inangan nil God.angan ke am waa Moses.antan. Nil Christ.an utham-a, nilaniya kaa -piichanathow thanang pam wanch God.antam anangan thama aak keenkanaman wun-wunin wik Moses.antam thonakaman ngeey-geeyin.

<sup>16</sup> A niyy wik inan thamp ngeeyāna, nil pam nathwey thawiya than wee-wee anangan way

min nungantaman uwayn nilan uthamowana. Yaa, nil pam uthamowan-a, pam wanch kampan nungantam anangana putha ngurp nungantam ananganweya than wik nungantaman konangam pi-pi ayn a way minan aathwayn ke nilaman thaw nil man-yethaman yippak iiy-iiy. Nil paman ke aman yippak mul wun-a, than kampan nungantamangan way min nungantamana ke yippak aathwuntan ya a, puth nil mul ke am yippak wun pamaniy.

<sup>17</sup> Nil paman man-yethaman yippak iiy-iiyan-a, than kampana putha ngurp nungantam al-alangan way min nungantama ke aathwuntan yippaka. Nilwey mulan wunow-a, an ep-paththama way minan aathwuntan nungantaman.

<sup>18</sup> Aakan yimanang wun thanttam keenkanaman: nil piip God.an thaw Moses.antan than pam wanchangana minh mulathayn a chaapar minh alantamana kalayn ngul aak altar aakanakan. Than ke wey minhan mulathiythan-a, minh bullock a goats anangan ke an uthamiythan-a, thananiya pam wanch God.antam ke iiyiythan ya a.

<sup>19</sup> A putha nil Moses.angan wik thayan God.antam anangana waa-waa thant pam wanchantan. Amanamaniya, thanana calves mulathin a putha goats thamp mulathin thanang a chaapar thanttamana kalin ngul a nenchanathin angman ngakangan. A nil Moses.angana yuk hyssop punth manyiy anangan maay thanang a kath yuk wool wewmanga a punchath ngul angan chaapar minhantamang.

Amanananiya nil Moses.angan yukan wunyath chaapar thaman – puth ka athaman lat ngench thayan piip God.antam angan-a, yukan wunyath, a pam wanchantang ngul wunyath.

<sup>20</sup> A nil Moses.ana thaw ngul pam wanchantan, “Chaapar inan thathaniya, an meenathan niyant niyan pam wanch God.antam ngul iiyaniya. Nilan thawa ngampar yimanangan yumpāmpa.”

<sup>21</sup> A amanamana nil Moses.angana aak tabernacle.ana chaapar alangaman ma thethang mak-mak a putha way min ngench thayan piip God.antam anangan thama ma thethang mak-mak thanang chaapar alangaman a putha aak tabernacle pekangkana ma thethang mak-mak thama.

<sup>22</sup> Wik thayan keenkanaman thawana than priests al-alangan chaapar minh al-alantamana ma thethang mak-makayn pam wanchantanga puth yuk way min al-alantangan thanan yipam pach wunayna mee piip God.antangana. Chaapar thethangan ke wey kuungkiy thanangan-a, yaa, piip God.ana ke kon-ngathiy nunang way thantam anpalan thanan yump-yumpin pam wanchangan.

*Nil Christ.angan Chaapar Nungantaman Ma-Thonam Anman Theetath Ngampar*

<sup>23</sup> Aak tabernacle.ana putha way min anangan thama aak tabernacle.angan wun-wunin-a, an ke maanyang thathanamp aak in kenyan heavenan want-wanttakan wunan. Than pam priests al-alangana chaapar minhantamang ma thethang mak-makin thanang chaaparang

minh goatsantamanga putha calvesantamang yipam way min anangan pach wunayn mee piip God.antangan. An puth chaapar minh al-alantamangana pach ke yumpiy aak piip God.antam in kenyan heavenana, ngampan yipam aak nungantamakan ngoonchāmp, an ya a, an aak min paththam nil-nil, an puth Christ.an utham ngampar chaapar nungantamana theetath ngampar yuk wuuyanangana, ngampaniya epa aak heavenakan iiyimpa.

<sup>24</sup> Nil Christ.anिया ke am ngoonch aak ngench thayanakan than pamangan yumpin, ya a. Aak tabernacle.an thathanamp-a, an ke maanyang thathanamp aak piip God.antam in kenya heavenana. Nil Christ.anिया aak piip God.antamak ep ngoonch, aak ngench thayan paththam a God.antang ngul wun-wunan, putha nilaniya thaa -pant thaw-thawan ngamparam God.antana.

<sup>25</sup> Than pam pi an priests anangan ke-ngoongkam iiy-iiyin kaap thon-thonangan aak ngench thayan paththam aakanakan chaapar minhantaman kal-kalin aak ngench God.antamakan. Puth nil Christ.anganiy-a, chaapar nungantamana puth-puthaman ke theethathiy nungamangan ngamparakanweya ya a. An anman kana ma-thonama chaapar nungantaman theetath ngampar

<sup>26</sup> Nil piip nungantam God.an ke am thaw nungant aak nathpalman puth-puthaman uth-uthamow, nil yipam chaapar nungantaman thaa -thaa angan theetathow ngampar, an ya a. Nil ma-thonam anman kan theetath nungamang ngamparweya, puth-puthaman

ya a. Nilaniy uk aak iikanakana, nil God.angan yipam way ngamparam anangana ke -ngul ngaantam-ngeeyow puth nanpalan nilan Jesus.an utham ngamparwey, aak-ya angan ke am utham ya a, nil chaapar nungantaman theetath way ngamparamak.

<sup>27</sup> Pam wanchan uth-uthamantan-a, an than ma -thonam anman uthamantan a anpalaniya nil piip God.angana um nungantang thanathan thanang a mepan thanang ngul, amanamaniya nil God.ana wiy al-alantan thawan nungantang angman wunayn, wiy ananganiya aak thonak kuchan thanang aak way aakanakan.

<sup>28</sup> Yaa, puth nanpalan nil Christ.angana ma -thonam anman theetath nungamang ngamparan. Puth ngampana way yot yump-yumpampa. Ke ngampaman uthamimpwey-a, puth ya a, pam nil Christ anman utham ngampar, nil yipam God.angan ke -ngul ngaantam-ngeeyow way yot anangan pam wanchangan yump-yumpin. Nil puth Christ.an palam wampow. Puth nilan palaman wampow-a, an nilan ke -ngul uthamow way ngamparamakan, ya a, puth nilan wampowa pam wanch nungantam anangan kaa-piichanathow thanang than anangan kuup-kuupantan nunganta.

## 10

*Chaapar Minhantam Alangan Ke Kaa-Piichanathiy Ngampang Way Ngamparam Amanaman, Ya a*

<sup>1</sup> Nil Jesus Christ.angan woyan nyiinganam wampath pam wanchant thanan yipam minam

iiy-iiyayn. Nil wampan-a, nil yipam ngampang kaa-piichanathow ngampan yipam woyan min nungantaman wakāmp a nungantang ngul yipam aak umpuyaman wunāmp. Wik thayan keenkanam Moses.antamangan waa ngampara nil Jesus.an ngul-ngulan wampowa, a waa ow ngampar woyan min paththam nyiingkanam alantamana. Puth wik thayan keenkanam alangana woyan chil min meenath ngamparweya, yotaman ke am meenath ngampar, ya a, manyam anman meenath.

<sup>2</sup> Thananiya minh-a, puth yuk way min thakan kal-kalin tabernacle.akan, puth ngangk min ke yippak wun thant, thanan ngeechanin ngangk thanttamang than ngul-nyaa im iiyin. Ngangk thanttam pachan wuniy-a, an epa thananiya ngul-nyaa an ke wuniythan, a putha minha yuk way min thakan ke kal-kaliythan piip God.antan.

<sup>3</sup> Puth thananiya, kaap thon-thonana yaam yippak minha yuk way min thakan kal-kalin God.antan. Yaa, puth amanamana thananiya anman kan ngaantam-ngeeyin thanttakaman thanan pam wanch min ya an, way yippakan iiy-iiyin,

<sup>4</sup> puth minh bulls.antam-a, a putha goats alalantaman chaapar alangan ke kaa -piichanathiy ngampang way ngamparam anpalan, an ya a.

<sup>5</sup> Puth nanpalana, nil Christ ngulan uk aak inpal kenyan aak iikanakan-a, nilan thaw piip-kunch God alantan:

“Nint कांग्क के wey ngayan minh bullocks, goats a yuk way min thakan thee āng nungka.

Nintan pamak ngulan yumpan ngayang ngayan  
 puth koyam ngul theetathāng ngathamang  
 thant pam wanchantan mak mul wunāng.

6 Than pam wanchangan minh anangan  
 wampathantan aak ngench thayan  
 nungkaramakan

a than priests al-alangana kiingkantan ngul,  
 nint yipam ke-ngul ngaantam-ngeeyān way  
 thanttamana thanan yump-yumpin.

Minh wiy anangan-a, puncham kiingkantan.  
 Puth ngangk min ke am wun nungkar minh al-  
 alantaman, ya a.”

7 A nil Christ.an thaw ngul,  
 “Ayyang, God-ang, ngay ina,  
 ngay puth aak ingan wampangana nintang yipam  
 wik ngeey-ngeeyāng nint ngeenan nathwey  
 thawān ngathara ngay yumpāng nungk,  
 ke than aak keenkanaman lat ngench thayan-  
 gan umpin, ngayangan waa in.”

8 Nil Christ.an ka atham wik inangan thaw  
 God.antan, “Than pam wanchangan minh  
 anangan wampathantan aak ngench thayan  
 nungkaramakan a than priests al-alangana  
 kiingkantan ngul, nint yipam ke -ngul ngaantam-  
 ngeeyān way thanttamana thanan yump-yumpin.  
 Puth ngangk min ke am wun nungkar minh  
 al-alantaman ya a.” Nungkway nil Christ.an  
 mee miy nil Moses.an thaw pam wanchantan  
 minhan wampathayn God.antan-a, nil wik  
 anangaman thawa.

9 A amanamaniya nil Christ.an thaw piip-  
 kunchantan, “Ayyang, God-ang, ngay ina, ngay  
 puth aak ingan wampangana nintang yipam



wik ngeey-ngeeyāng nint ngeenan nathwey thawān ngathara ngay yumpāng nungk.” Yaa, puth amanamana piip God.an thaw pam wanchantan minh ke-ngul wampathayn aak ngench thayan aakanakan. Ngeenam puth minhan ka athaman wampathin e? Nil yipam God.angan way thanttam anangan ke-ngul ngaantam-ngeeyow. A nilaniya puk nhengk nungantam ngul kuchan ngampar aak iikanakan uthamow way ngamparamakan.

<sup>10</sup> Nil Jesus Christ.angan wik ngeey nungantam piip-kunch God.antaman, nil puth theetath nungamangwey uthamow ngampar yuk wuuyanangana, nil puth piip God alangana nanpalaan ngangk pachath ngamparamana. Puth nil Jesus.ana ma -yotaman ke am utham ya a, ma -thonam anman utham kana.

<sup>11</sup> Puth priests yot anangana work iiy-iyyin ngaa thon-thonan aak ngench thayanang angana. A thananiya than-thanin um altar aakanakan a minhan kiingk-kiingkin ngul ma -yotam. Puth anpalan pam wanch anangan ke am kaa -piichanath thanang way thanttam anpalana, ya a.

<sup>12-14</sup> Puth nil Christ.angan ma -thonam anman theetath nungamang uthamow ngamparan yuk wuuyananganwey, nil God.angan yipam kaa -piichanathow pam wanch ngampangwey way ngamparam anpalan, a ngangk pachathow ngampang, a min yumpow ngampang, aak anpalman pam wanch wuut mangkangan aak wakin-a, aak iikanakaman pam wanch nyiingkanamang ngulan aak wak-wakantan, a puk thanttamang ngulan aak wakayn-a, puy-

puyam ngul. Nilaniya ke am puth-puthaman theetath nungamang ngampar an ya a, mathonam anman kan utham ngampar. Nil kanan utham-a, niliya piip-kunchantang God.antangan ngul nyiinan a moom wuut pi an ngul pul karpam God.angana. Nil Christ.an kuup-kuupan ngul aak in kenyan aak-aakanakaman nil piip God.angan pam wanch maalathowan thanang, than anangan ngangk-wayangaman kal-kalin nunang Christ.an, puth thananiya meek ke -ngul iiyayn.

<sup>15</sup> Nil Ngeen-Wiy Min God.antam alangan tham waa woyan God.antam nyiinganaman.

<sup>16</sup> Nil puth ka athamana wik inangan thaw: “Nil Lord.an thawana: aakan ngul wampow ngay ngulan wik nyiinganam wiy-wiyam anangan waa -waa āng thant pam wanch ngatharamakan,  
a putha ngayaniya ngul wik yump-yumpāng thanttanganwey, wik inangana:  
ngayiy wik ngul thaw-thawāng thant pam wanch ngatharamakanwey,  
a puth wik ngatharam ngangkang ngul ngoonchow thanttang  
a than woyan ngatharaman ngul wak-wakayna.”

<sup>17</sup> A nil inan thaw thamp, “Ngayana ke -ngul ngaantam-ngeeyāng way thanttaman thanan yump-yumpin, an ya -ngul.”

<sup>18</sup> Yaa, ngamp imanaman ngula, ngampaniya ke -ngul may minh thakan kalāmp ngul aak ngench thayan piip God.antamakan nil yipam kon-ngathow nunang way ngamparam anangan ngampan yump-yumpanamp an ya -ngula, nil puth kanam kon-ngath nunang God.an way

ngamparam anangan. Nil ke-ngul ngaantam-geeyow way ngamparam anangan iy ya a — amanamana, ngamp ke-ngul minh kalāmp aak ngench thayanakana.

*Ngamp Ngangk Thayanam Thinth-Thinth Ngul Iiyāmp Nungant Piip God.antan*

<sup>19</sup> Yaa, ngamp pam wanch Christians inan-gana, ngampiya ngangk thayanam thinth-thinth ngul iiyāmp nungant piip God.antan, aak in kenya aak ngench thayan paththam, nil puth Jesus.anganweya chaapara nungantaman thee-tath ngamparwey ngamp yipam nungantang iiy-iiyāmp.

<sup>20</sup> Nil kanam utham yuk wuuyanangan-a, yaa, puth nanpalan nil woyan nyiingkanaman meenath ngampar God.antaman ngampam yipam wampāmp nungant God.ant. An ke nil Christ.angan yuk curtainan maay ngul aak um-menhangan waanchin aak ngench thayan God.antamangan, ngamp yipam thinth-thinth wampāmp nungant God.antan. Woyan keenkan wun-a, kan-ngul minch thanttam, puth nil pam Christ anana man-yetham aak umpuyam wun-wunan, nil meenath ngampar woyan nyiingkanaman aak want-wanttakan wunowwey.

<sup>21</sup> Nil Christ.aniya priest wuut pi an paththam, nil ma nungantang pi-pi an ngampang pam wanch yot God.antam anangana —

<sup>22</sup> yaa, puth ngampana ke winyngang mo āmp God.antamana, ngamp ngangk minangam iiy-iiyāmp nunganta. Ngampana mee miy ngula nil

Christ alangan woyan min nyiinganaman inan yump ngampara, a putha nil pachath ngangk ngamparam inangan ngotanamana pach yipam wunow, ngampan yipam ke-ngul ngul-nyaa an wun-wunāmpwey way yot ngamparam anpalan. Thanana kootra kuungkin ngampang, an kan meenathan aniya pach ngul iiyanamp.

<sup>23</sup> Ngampaniya in keny ngaantam-ngeey-ngeeyāmp ngampan puth mee miy nil God.angan yipam kalow ngampang aak minak, yaa, ngampiya ngangk thayanam anman monkan-wak-wakāmp nunang Christ.an, nil puth God.an man-thonam, niliya ke wik uuy-uuyaman ya a, nil kan-kanam kalow ngampang nungantakamana ke nilaman kaa ngak ngampang. Yaa, ngampaniya ke mel enchāmp woyan min nungantam anpalan.

<sup>24</sup> A putha ngampiya ngaantam-ngeeyāmp ngamparakamweya a ma-aathwump thamp, ngangk minangam iiy-iiyāmp ngamparakamana, a putha ma-aathāmp thanangwey pam wanch anangan.

<sup>25</sup> Pam wanch puungk wiyiya ke am yalmathwuntan yipam karpam mee-wuthanamanakan God.antan putha thaa-kuumpayn nunangan ya a, ngampaniya murkanam anman yal-yalmathwump karpam mee-wuthanamanakan piip God.anta puth ngaantam-ngeeyanakan wik nungantam anangan. Puth ngampaniya kan-kanam ngangk minangam kon-aathwump ngamparakaman ngamp yalmathwumpana, puth ngampan mee miy ngul Christ.an palaman yaam ke anam

ngul wampow ngampar.

<sup>26</sup> Niiy in ngeeyāna: ngamp kan-kanam mee miy ngul wik min Christ.antaman an kan-kanam paththam. Ngampwey koyaman iiyimp woyan way aakanakana a Christ.an wantimp nunangan-a, nil wee uthamow ngampar a? way ngampan yump-yumpanamp a? An ya paththam a! Pam thon ke Christ yimanangan ya a. Ngamp nath Christ.an wantimp nunangwey-a, nil puth piip God.ana ke kon-ngathiy nunang way ngampan yump-yumpanamp, ya a.

<sup>27</sup> Ngamp wee -wee anangan nath way paththaman yump-yumpimpwey-a, ngampana ngangk winy-winyayang kuup-kuupimp nungant God.antan, nil nath kuchow ngampang aak nungantam anpalan aak wayaka, an puth way-wayam ngamparaniyweya. Nil God.aniya ngangk kul karkan weemow thant pam wanch al-alantan than thaampantan nunangan a puth than ngangk-wayangan kal-kalantan nunang, nil puth piip God.angan ngul wayathow thanang.

<sup>28</sup> Aak keenkanamana, pam wee ang nathwey wik thayan pipiwa Moses.antaman, kaangk ke an ngeeyow-a, pul nath pam kuchamang waa iypul nunang wuut manth-thayan al-alantan, nath than pam ko alamangweya, thananiya mulathiythan nunang pam nil wik thayanan pip, an than ke ngangk mamiythan nunang ya a.

<sup>29</sup> Kan niiy in ngeeyāna: nil nath wee angweya Moses.antaman woyan minan wantow-a, yaa, an puth way nungant, puth nil wee anganweya ngangk-wayangam kalow puk nhengk God.antaman-a, yaa, an puth ep way-

wayam paththam nunganta. Pam anan nath thawiy chaapara Christ.antamana ke way-wayam paththam ngampara, an puth ya a, nil Christ.angan chaapar nungantam theetath ngamparwey nil yipam piip God.angan ngangk pachathow ngampang, ke nil keenkanaman kaa ngak ngampang. A puth pam wiyangan nath aak-ya ang waa iythan nunang Ngeen-Wiy Min God.antaman, nilan puth min anman iiy-iiy ngampara, thanwey konchiythan nunang, a thaa -thengkathiythan nunang thakana. Puth amanamana, nil God.angan wayathow thanang, way-wayam paththam yumpow thantwey pam al-alantaniya.

<sup>30</sup> Puth ngampan God.an mee miy nunang, puth nil wik thaw yimanangan, “An puth work ngath-ara ngayan wayathāng thanang pam wanch anangan. Ngayam thonakam wayathāng thanang pam wanch wayan iiy-iiyantān.” Puth nil piip God inan thampa thaw, “Ngay piip God niyantam ilangana um ngatharang thanathāng niyang pam wanch ngatharam inangan, ngayaman ngul thawāng ngay nath wayathāng niyang, nath ya a.”

<sup>31</sup> Pam wanch wee -wee anangana nil God.angan wayathow thanang-a, an way-wayam paththam thant, ngangk akangam thanayna, nil puth God.an murkanim anman man-yetham wun-wunan.

<sup>32-33</sup> Niiy kan niyantakaman ngaantam-ngeeyāna: niiy ka athaman ngangk niyantaman thee an Christ.antan-a, than pam wanch anangan way-wayam paththam iiy-iiyin niyantwey way thak yumpin niyantān. Wiyiya than thaa-

thengkathin niiyang mee yotantangwey, wiyiya piik-piikin niiyang. Wiyiya than pam wanch wayanang al-alangana than way tham yump-yumpin thant pam wanch puungk wiy God. antam al-alantan. Niiyan puth ngangk maman thanangweya, a niiyan puth thanttang ngul nenchananweya. Puth an-aniyangana niiyan ke wantan nunang Christ.an ya a, niiyana ngangk thayanam monkan-wak-wakan nunang. Niiyang wik anangan ke kon-ngathow, kuchekangam pi-pi ān.

<sup>34</sup> A than Christians puungk wiy anangan jailang thenchin thanangan-a, niiyia ngangk maman thanangwey a minam pi-pi an thanang. Than puungk wiyangan-a, way min thak ma-kuchathin niiyantam, puth niiyan ke thawan way min amanaman putha niiyantam man kulan ke wamp, ya a, niiyana ngangk minangam iyy-iyyan an puth niyy mee miy nil piip God.an min iyy-iyyan niiyant, an niiyana aak umpuyam wunān aak God. antamang – in min paththam niiyanta.

<sup>35</sup> Yaa, puth anpalana, niyy ngangk thayanam anman iyy-iyyān Christ. antang, ke wantān nunang Christ.an. Puth nil God.angan thath-thathan niyyang, anpalan nila ngangk minangam iyy-iyyow niiyant, aak min nungantamak kalow niiyang.

<sup>36</sup> Niyy ke eenchān, ngangk thayanam puy-puyam iyy-iyyān niyy yipam minam iyyān ke God anman thaw niiyant. A amanamana, nilaniya min iyy-iyyow niiyant ke nilaman thaw niiyant.

<sup>37</sup> Puth nil God.angan wik inangan waa an lat ngench thayanangan:

“Yaam ke anaman-a, nil Christ.an palaman

wampow niyant,  
 puth aak yaaman ke kuupiy, ya a.  
 38 Pam wanch min-miniy ngatharam al-alangana  
 wik ngul ngeeyayn ngayang, puth  
 ngangkangam pi -pi ayn ngayang,  
 a putha aak ngatharang ngul wunayn.  
 Nil wee angweya ngayangan wantow-a, woyan  
 min anpalan weentow-a, man-mangkaman  
 thee owar-a,  
 ngangk min ke wunow ngathar nungantam an-  
 palana.”  
 39 Puth ngampaniya ke man-mangkam thee āmp  
 God.antan, putha ke wantāmp nunang, ya a —  
 yaa, puth amanamana, nilan ke kuchiy ngam-  
 pang aak nungantam anpalana. Ngampaniya  
 ep-paththam murkanam anman ke -ngoongkam  
 ngangk ngamparamangan pi -pi āmp nunang, a  
 putha monkan-wak-wakāmp nunang thamp a ni-  
 laniya ngul kalow ngampang aak nungantamak.

## 11

*Inan Wik Kath Than Pam Wanchangan God.an  
 Ngangkangan Pi -Pi in Nunang, Keenkana*

<sup>1</sup> Ngamp puth wee -wee anangan ke -  
 ngoongkam God.an ngangkang pi -pi anamp-a,  
 an ngamp ke eenchanamp, ngamp kan-kanam  
 ngaantam-ngeeyanamp nunang, ngamp mee miy  
 nil min anman iiy-iiyow ngampar. A nungkway  
 ngamp ke thathimp ngeen nathan wampow  
 ngampar-a, aak ngulan-a, ngamp anman minam  
 ngaantam-ngeey-ngeeyanamp nil God.angan  
 minam ngul pi ow ngampang ke nilan kaa ngak  
 ngampang.



<sup>2</sup> Aak keenkanamana than pam puungk wiy alangan piip God.an ngangkang pi-pi in nunang. A amananiya nil God.angana pam min waa thanang.

<sup>3</sup> Ngamp kan ngaantam-ngeeyanamp nil piip God.angan aak inan umyompanaman yump. Nil wik thonakaman thaw-a, a way min anangan kan-ngul wunin nilan yump, ma mangkam anangan. Nathpalman keenkanamana, aak yuk ke anang than, aak ya -ya am. Ngampaniya mee miy ya a nil aakan want-wanttak-ma yumpa, ngampiya aak inan thathanamp thonakama, puth ngampana ke am thathamp nunang piip God.an aakan want-wanttakan yump. Puth ngampana mee miya nilan yumpa ngampang a aak thakan yump, ke-paal ngampaniya ngangkangan pi-pi anamp nunang.

<sup>4</sup> Aak keenkanamana, pam Abel anana nil God.an ngangkang pi-pi nunang, yaa, puth amanamana nil Abel alangana yuk way min min-miniy paththam wampath nungant God.antan. Yuk way min nil wuny-kunchangan wampath piip God.antana an wayananga. Puth nil God.angana pont-kunch Abel.an thaa-kuump nunang pam min waa nunang, puth nanpalan nil ngangkangam pi-pi nunang God.ana, a puth nil yuk way min min-miniy wampath nungant. Nil God.angana yuk way min nungantaman maay puth meenath nungant nilana ngangk min paththam wunanta. Nungkway pam Abel anana keenkam utham-a, an puth nilaniy ke in-inman thaw-thawan ngampar, nilana woyan min meenath ngampar ngamp yipam piip God.an

ngangkang pi -pi āmp nunang.

<sup>5</sup> Aak keenkanamana pam thonangan namp Enocha inana nil thampa God.an ngangkang pi -pi nunang a anpalana, nil man-yethaman yippakan iyy-iiy-a, nil piip God.angan man-yetham anman kal nunang aak imanaman aak-aakanak kenyan heavenakan, nil ke am mul wuna, ya a. Nilana lam-lam ya ama than pam wanchangan ya angam wenk-wenkin nungantwey, ke am uwin nunang ya wey, puth nil piip God.angan yimanaman maay nunang aak-aakanak keny heavenakan. Puth lat ngench thayanangan wik inan waa an; ka athaman nil God.angan ke am yippak Enoch.an maayan-a, nil God.an ngangk min wun Enoch.antaman nilan puth Enoch.angan ngangkang pi -pi nunang.

<sup>6</sup> Ngamp ke an God.an ngaantam-ngeeyanamp nunangan-a, a putha ngangkangan ke an pi -pi anamp nunangan-a, ngampana ngangk min ke yumpimp nunang, ya a. Ngamp wee-wee anangan nathanweya kaangk thinth-thinthan wampāmp God.antan-a, yaa, ngampana ngaantam-ngeeyāmpa nil God.an man-yetham wun-wunan a putha nil min iyy-iiyan thant pam wanch al-alantan than wee -wee anangan kaangk wampayn nungant.

<sup>7</sup> Aak keenkanamana pam thonangan namp inana Noaha nil thampa piip God.an ngangkang pi -pi nunang. Nil piip God.an thaw nungant pam Noah alantan nil ngulan wayathow thanang pam wanch yotam anangana. Nil Noah.angana ke thathiw ngeen nath ngulan wampow thantweya, ya a, puth nilaniya wik piip God.antamana ngeey

a chukkun wuut pi an yump kampan nungantam anangan yipam kaa -piichanathow thanangwey ngak kaap pi an anpalana. Pam wanch wiy al-alangana man-ngeeyin wik anana ngak kaap pi anang ngulan uwow thanangweya, puth nil pam Noah alangana wikan ngeeya God.antamana a nil meenath thant pam wanch wiy al-alantan than wayan yump-yumpina. Nil puth God.angana Noah.an ke puk nungantam min waa nunang, nilaniya puth kan-kanam ngangkangan pi-pi nunang.

<sup>8</sup> Thon pam Abraham alangan aak keenkanamana God.ana ngangkangan pi-pi nunang. Nil piip God.an thaw nungant Abraham.antan aak nungantaman wantowa a aak thonak ngul iiyowwey, a nil wik God.antaman ngeey a nil kangul iiy aak thon aakanakan nil God.angan aak mi nungant. Nil piip God.an thaw Abraham alantan nil aak kech iiyow, a aak angan-a, aak thon ngul uwow nil God.angan thee owant. Nil Abraham.angan aak anan ke aman thath keenkanwey aak anan thee owant piip God.angan, puth nila a kampan nungantam al-alangan than kan-ngul way min thantaman yal-yalmathin a kan-ngul iiyin aak kechakan.

<sup>9</sup> Than kanan wampin aak angan-a, thanana aak angman ngul wun-wunin. Nungkway than pam wanch thaa nganth thon wun-wunin-a, puth aak kechaman wampin-a, nil pam Abraham alangan ke -ngoongkam anman God.an ngangkang pi-pi nunang. A nilam Abraham.ana putha kampan nungantam anangan thana, puk nungantam Isaac.ana putha puk nilaman puulanchin

Jacob.an thampa, thananiya yuk tentsang wun-wuninwey, aawuchang ya a. Nil God.an thaw pulant, Isaac a Jacob.ant, “Aak inan niyant tham ngul wunowa.”

<sup>10</sup> Than tentsang wun-wunin-a, puth nil Abraham.an kuup-kuup aak thon aakanakan, aak anana nil God.angan yump aak yam kenyan, aak anman aak umpuyaman wun-wunow.

<sup>11</sup> A putha wanch nungantam Sarah alangan thamp God.an ngangkangam pi-pi nunang. Nil God.angan waa nungant nil puk manyan kalow, puth nil Sarah.angan kan-kanam ngaantam-ngeey nil God.angan wik ngul pi ow nilan kaa ngak nunang. A amanamana, nil nungkway wanchinth ngulan weem-a, nil puth piip God.angan ma-aath nunangwey nil yipam puk many wuut uwow nungantam Abraham.antaman.

<sup>12</sup> Nil pam inan Abraham.ana an wuut ngul weem, nil pam komp ya a puth ngul-ngulana nilan wuut mangk ngul ween pam wanch yot thaa-wantanamak. Pam wanch thaa-wantanam ngul weenin ke thunp inang kenyan aak ngutangan thathanamp thunp thaa-wantanamana. Puth ngampaniya ke countimpungimp ngaanh yot thompangan wun-wuntana, an ya ngaanh yot-yotama, than pam wanch ananganiya yimanangan weenin.

<sup>13</sup> Nilam Abraham.ana putha Isaaca a putha Jacob than pam ko alam il-ilangana ke am thathin pam wanch anangan nil piip God.angan kaa ngak thanang puk thaa koy-koyyuan aak-ngeey-ngeeyaynana, than ke am thathin thanangwey,

ya a, puth thanana aakan ke am thathin yippak, nil God.angan kaa ngak thanang nil thee owan thant. Thanana wik God.antaman ngangkangam anman pi-pi in aak-aakanakaman uth-uthamin ngulana. Thanan kan ngaantam-ngeeyin than aak ingan earthangan yaanan wun-wunin, than ke pam wanch aak wachanaman ngaantam-ngeeyin thanttakam, puth ya a, aak thon in kenyan thant.

<sup>14</sup> Than wee-wee ananganwey-a, wik yimanangan ngaantam-ngeeyiyan ke Abraham wee anangan ngaantam-ngeeyin-a, than al-alangan meenathantan ngampar than kanan ngaantam-ngeeyantan aak thon in kenyan ngampar, thanan puth aak thath-thathantan aak min aakanakanwey.

<sup>15</sup> Than Abraham wee anangana nath iingkwun-nyathan aak thanttamakan thanan wantin-a, an than koyaman iyyiyan, puth ya , thanana ke am iingkwunin aak thanttamakana.

<sup>16</sup> Thanana epa kaangk wunin than aak min aakanakan iyyayn aak in kenyan heavenana. A putha ngangk min wun nungant piip God.antan puth nilana God thanttama an nil ke ngul-nyaa an wunyan thanttaman, an ya a, an puth nil aak pi-pi an thant aak in kenyan, thanan yipama angman wunayn nungantang.

<sup>17-18</sup> Thonangan wik kath inan Abraham.antaman. Nil piip God.an thaw Abraham alantan, “Nhengk nungkaram Isaac.antaman pam wanch yot-yotam thaa-wantanamana aak-ngeeyayn ngul. A anpalana, nint wuut mangk thanttam yotantam ngul iyyāna.” Nil

Isaac.an puk pi an ngulan iiy-iiy-a, nil God.an thaw nungant piip-kunch Abraham alantan puk nungantam kaa-thonaman Isaac.an kuuyang kathow nunangwey a thumang kiingkow nunang altar angan ke minh yimananganwey. Nil God.an Abraham.antan yimanangan thaw nungant, nil yipam thathow nunang Abraham.an nil nath wik nungantaman ngeeyow natha, nath ya a, ke ngeeyowa. Nil puth Abraham.angana altar angan wunp nunanganwey, nil wik God.antaman erkam ngeey puth nilan ngangkangam pi -pi nunang.

<sup>19</sup> Nil Abraham.angana kan-kanam thiich nil piip God.an pam pi an, nil Isaac koyaman ekathiy nunang mulaman. A nil Abraham.angan kan ke mulathiy nunangan-a, puth nil God.an thawant, “Ayyang, Abraham-ang, nint ke mulathān puk nungkaramana.” Yaa, nilaniya ke am mulath nunang, ya a. An nil ke God.angana koyam thee an puk Isaac.an piip-kunch Abraham.antanwey, an ke nil koyam mulaman eka.

<sup>20</sup> Nil Isaac.ang thampa ngangkangam pi -pi an God.an. Ngul-ngulanweya, nil Isaac.an pam wuut kath ngulan ween-a, nil nhengk nungantam Esau a Jacob.angan waa pulant nil God.an minam iiy-iiyow pulantan, puth nilan kanam thiich wik anangan nil piip God.an keenkanaman thaw nungant Abraham.antan an wik kan-kanama.

<sup>21</sup> A putha nil Jacob.angan thampa God.an ngangkangam pi -pi nunang. Ngul-ngulaniya, nil wuut kath ngulan ween-a, putha ngangk way ngulan wun-wun-a, niliya wik min thaw pulant puk kucham Joseph.antum al-alantan. Nilana

yuk thook nungantamang thaamp nungamang-  
wey a kuchek pekam ngul thuchwey ke nil mee -  
wuthanaman God.anta. A amanamana nilan  
waa pulant, “Nil God.ang min-min ngul pi ow  
nipang,” puth nilan mee miy wik anangan God.an  
thaw Abraham.antan wik anangan kan-kanam.

<sup>22</sup> A nil Joseph.angan thampa God.an  
ngangkangam pi -pi an. Nil kan-kanam thiicha nil  
God.angan ngulan koyam pentathow thanang aak  
Egypt amanamana, a kalow thanang koyam aak  
min thanttamakan. Nil Joseph.an way-wayam  
ngulan wun uthamanakan-a, nilana thaw thant  
kampan nungantam al-alantanwey, “Ayyang, nil  
God.ang ngulan koyaman kalow niyang aak min  
ngamparamakan-a, niy kaanch ngatharamana  
karpam kalān.”

<sup>23</sup> Kaath piip Moses alantaman thampa God.an  
ngangk pulantamang pi -pi pul nunang. Nil  
Moses.an aak-ngeey-a, thanan thathin nunang  
puk manyan kempathiya putha thanchiy thampa.  
Puth nil pam pi an kingan thawa, “Puk wuut  
ma mangkamana mulathān thananga.” Puth  
pulana kaath piip Moses alantamana ke am  
winnyang mo pul pam pi an King alantamana  
ya a, pulana puk many pulantamana wuthanang  
thenchpul nunang kep ko alamakwey puth  
pulana kan ngaantam-ngeeypul nunang God.ana,  
nil minam ngul pi ow puk many pulantaman.

<sup>24</sup> Nil Moses em-eman-a, nil thampana God.an  
ngangkangam pi -pi nunang. Nilaniya kingan-  
tamang puk nhengk alangan em-emath nunang  
puk manyamanwey, puth Moses.angana kaangk

ke a wanch koman alangan waa ow nunang puk nungantamana, ya a.

<sup>25</sup> Nilana kaangk ke wantow thanang pam wanch anangan God.antamana, nil kaangk ke yaam wunow aawuch min wuut pi an kingantamangana, ya a. Than pam wanch aak Egypt punchan al-alangan pam wanch God.antam ananganwey piik-piikin thanang a putha waa -waa in thanang putha man-aath-aathin thanang thakweya, puth nil Moses.ana kaangk paththam iiyow thanttang anangan pam wanch God.antam al-alantanganweya puth nil God.an ngangkang pi -pi nunang.

<sup>26</sup> Nil Moses alangana yimanangan ngaantamngeey, “Way min aak in punchanana an min mee ngatharangana ke am wunana ya a. Ngayaniya pam wanch God.antam al-alantangan iiy-iiyāng — in min paththam. Than pam wanch aak in punchanangan natha thaa -thengkathiythan ngayang putha piik-piikiythan ngayang, ke than pam wanchangan ngul piikayn nunanga putha thaa -thengkathayn nunang pam anan nil God.angan kuchowan. Puth kana, than mak way yump-yumpayn ngatha, nil God.an min ngul iiyow ngathar aak min nungantamang ang kenyan.”

<sup>27</sup> Nil Moses.angana murkanim piip God.an ngangkang pi -pi nunang, a ngul-ngulana nilaniya aak Egypt.ana too want ngul. A nil pam pi an kingana man kul wampant, puth nil Moses.ana ke am winyngang mo nungantaman ya a. Ngamp pam wanchangan piip God.an ke thathimp nunang ya a, puth nil Moses.angana ngangk thayanam monkan-wak-wak nunang piip



God.an ke nil thath-thathan nunang yimanangan.

<sup>28</sup> Ngul-ngulana nil God.an thaw ngul Moses.antan nil ngaantiyongkan kuchow nunang aak anpal kenyan a puk kaa-ngeecham wuut anangan thanttam nil mul-mulathow thanang puk aak Egypt anpalmanwey. Nil God.an thawant thamp: than pam wanch Jews al-alangan nath wik kan-kanam ngeeyiythan nunangwey-a, yaa, nil ngaantiyongk alangan ke mulathow puk wuut kaa-ngeecham anangan thanttamana ya a. Nil Moses alangan ep-paththam wik ngeey-ngeey nunang God.ana a putha nil tham mee miya nil God.angan minam ngul pi ow thanang. Nil Moses.ana thaw pam wanch Jews al-alantan minh lamb mulathayn ke nil God anman wik thawant a chaaparangana thaa doors aawuch thanttamangana wonk-wonkang ma thethang mak-makayn. Puth thanan wik nungantaman ngeey-ngeeyin ke -paal God.angan minam pi-pi thanang.

<sup>29</sup> Ngul-ngulana, nil piip God.an thaw Moses.anta putha pam wanch Jews.antan wo uw wuut pi an Red Sea wakan menh-menhang iiy-iiyayn. A thananiya wik God.an ngeeyin nunang, an puth thanan kan ngaantam-ngeeyin nunang, nil minam ngul kalow thanang wo uwayn aakanakan. A thananiya kan-ngul iiy-iiyin ke aak woyan e ang yimanangan iiy-iiyinwey puth ya a, nil God.angan ke woyan e paththam yump thant wo uw um-menhang than yipam wonk wo uwaynakan iiyayn. Puth ngul-ngulana than pam Egyptians anangan mo-mo in koy-koyuw pam wanch Jews al-alantangan, puth ya angam,

thanana ngakangam thuchin mulakam.

30-31 Amanamana pam wanch Jews anangan minam kan-ngul iyy-iiyin aak min Canaan aakanakan God.angan thee aak Abraham.antan keenkanaman. Nil God.an thaw thant Jews al-alantan kul yumpayn thant pam wanch aak Canaan puchan al-alantan puth than nunang God.an thaamp-thaampin. Thananiya iyyin ngul aak Jericho.ak. A thanan thathin walls achantangan yumpin, a town thanttamana menhang than. Nil pam Joshua alangana pam kucham keenk kuch pulang aak anan thathowpula. Aak anganiy wanch wun-wun, namp nungantiya, Rahab. Nil wanch inman Rahab.ana maarich-weentha, pam thon-thon kuyam maarich kee ath thanang. Nungkway nil wanch waya, puth nilaniya wik God.antamana ngeeyweya a pam kucham anangan pula aawuch nungantamang pi pulangwey may thak aath pulang. Ngul-ngulana, nil piip God.angan wik inan waa thant pam wanch nungantam Jews al-alantana, “Niiyaniya kinch sevenakama wallsan weentathān aak Jericho angana. Kinch sevenang kanan wantow-a, wallsan aakang ngul keekayna.” Thananiya wik God.antamana ngeeyin a aawuch walls achantangan weentweentathin ngul a kinch sevenang kanan want thanang-a, walls achantang anangana aakangam keekinwey. A thanana pek ngul ngoonchin thant, a pam wanch yotam mulathin thanang, than anangan wik ke aman ngeey-ngeeyin nunang God.ana puth thananiya Rahaba putha kampan nungantam anangana ke am mulathin

thanangwey ya a, nil puth Rahab alangan pam kucham anangan minam ngoonchath pulang aawuch nungantamangan.

<sup>32</sup> Ngay wik wiy thaman waa inga, aak keenkanaman pam inangan iiyin, namp inangan, Gideon, a Baraka, putha Samsona, a Jephthaha, a putha pam David anana a pam thoniy nampa Samuel, a puth than pam prophets anangan wik min God.antaman waa -waa in thant. Ngay puth wik ma mangkaman latangan ke umping ya a an puth ngayan yaam nath latangan ump-umpinga.

<sup>33</sup> Puth than pam al-alangana God.an nunang ngangkang pi -pi in a thananiya minam ngul iiy-iiyin, yaa, puth amanamana than pam God.antam al-alangan pam wanch wiy anangan aak thon-thonangan piik-piikin thanangwey, ke ma thee in thant, a putha than pam wiy anangan moom iiy-iiyin a pam wanch minam pi -pi in thanang, a putha than pam wiy anangana aak anangan wun-wunin nil piip God.angan kaa ngak nunang Abrahaman. Wiyiya than pam al-alangan minh lions anangan thaa im mamin thanang ke yipam mulathayn thanang.

<sup>34</sup> Nungkway thum karkanim pench-pench-a, thananiya erkamim uthathin. Than wiy ananganiya nhengk-peempan pepan thampanim wampin mulathanak thananganwey-a, thanan nathim appenchin thanttaman. Kemp thanttaman way ngulan ween-a, nil piip God.angana kemp thayanath thanangwey. Thananiya pam soldiers min-miniya weenin, a pam yot anangan kan-kanam piik-piikin thanang aak thon-thonangan wun-wunina, ke am ma thee -thee in

thantweya, ya a.

<sup>35</sup> A putha wanch puungk wiyangiya piip God.an ngangk thanttamang pi-pi in nunang. Wiyiya puk many thanttam uthaminweya, puth nil piip God.angan koyam mulaman ekath thanang, puth than kaath thanttamangan min-minam ngangkang pi-pi in nunang God.ana. Wiyiya pam wanch way al-alangan pam wanch God.antam anangan piik-piikin thanangwey, mul-mulathin thanang thaka. Thanan thaw-thawin thant pam wanch God.antamakana, “Niiy nath God.an wantin nunangwey-a, an epa ngan ke piikin niiyang.” Puth than pam wanch God.antam anangan thaa-thayanam thawin thant, “Ya a, ngan ke wantin nunanga.” Thana puy-puyam monkan-wak-wakin nunang a putha kaangk wunin nungant, thanan yipam ngangk aak umpuyaman wunayn aak min nungantamang angana.

<sup>36</sup> Puth wiyiya than pam wanch anangan than kaangk ke an Goda, thananiya thaa -thengkathin thanangwey a piikin thanang pam wanch God.antam anangan yuk whipang thak piik-piikin thanang putha wiyiya jailang thenchin thanang a ma a tha chainang kathin thanang wallang angman.

<sup>37-38</sup> Wiyiy kunttowangan piik-piikin thanang mulakama, mul ngul wun-wunin, wiyiya ump-umpin thanangwey yuk saws pepananga, puth ompam thalakang kuyam umpin thanangwey, wiyiya nhengk-peempan ongang mul-mulathin thananga. Puungk wiy anangan thana meech-meecham wun-wuninwey may ke anang pam

wanch God.antam anangan, thantaniya ngangk way paththam wun puth kaangk-ke anangan iyy-iiyinweya, puth thananiya pam wanch minnam paththam iyy-iiyin ke wiy yimanangan ya a. Than minh pe an sheepantama putha pe an goatsantam kempangan kal-kalinwey a kan-ngul iyy-iiyin aak pital wakanangan putha aak yoyk wakanangan iyy-iiyin a putha awar kunttowangan wunin, wiyiya awar aakangan uwina a angan wuninwey, puth thananiywey aawuch ke anang. Than pam wanch ke aman monkan-wakin God.an-a, an than way-wayam paththam iyy-iiyin thant pam wanch God.antam al-alantan thantangan wun-wuninwey.

<sup>39</sup> Puth nil piip God.angana thaa -kuump pam wanch anangan than nunangan ngaantam-ngeeyin putha ngangkangan pi-pi in nunang. Nil min thant ep iyy-iiy puth thanana ke am thathin Christ.ana ya a.

<sup>40</sup> Puth nil God.an kaangk minam iyyow ngampar thamp, puth nilana inan ngaantam-ngeeya: nil Christ.angana ngul yalmathow ngampang putha pam wanch keenkan wun-wunina, ngamp karpam minam wunāmp aak umpuyam nungantangan.

## 12

### *Nil God.an Piip Ngamparama*

<sup>1</sup> Yaa, ngampaniya ngaantam-ngeeyāmp pam wanch anangan than keenkan monkan-wakin nunang God.an, than ke yaman thanthantan ngamparangwey a thath-thathantan

ngampang Christians.ana. Yaa, ngampaniya min-minam iyyāmpa. Ngamp ke race yimanangan mo -mo anampa, kamp othamayan yuurpaman mo -mo anamp. Kulich yotan kempangan ke ngoonchāmp putha way min maangan ke kalāmp thamp, an puth anhan yumpiy ngampang. An puth ke aak yimanangan wuna: pam wanch wiyangan way min min-miniy ngaantam-ngeeyantan, ke puth wantiythan. Wik God.antaman kon-ngathan thanang, ngangk thanttamana way min aakanakaman wun-wun thant. Pam wanch wiy anangan-a, kaangk way anman yump-yumpayn. Kulich yotan ke ngoonchimp race.angan, an ke way al-alangan koyam wich-wichan ngampang, othamayanan kamp ke mo imp. Yaa, ngampanwey-a, Christ.an monkan-wak-wakāmp nunang minam anmanweya, wayana wantāmpa, ke -ngul yumpāmpa, ngangk thayanam yuurpam anman woyan min wak-wakāmp God.angan meenath ngampar.

<sup>2</sup> Ngampan ke -ngoongkama wik ngeey-ngeeyāmp nunangana Jesus.ana. Woyan min ka athaman nilaman wak-wak, — yaa, ngampaniya woyan nungantam anman wakāmp. Nilam thonakam ngul ma -aath-aathow ngampang woyan min God.antaman wak-wakāmp. Nil puth Jesus.angana ke am week kemp nungantaman; nil aak thaampwey yuurpam iyy yuk wuuyanakan a utham ngampar chaapar nungantam theetath ngamparwey. Thanan yuk wuuyanangan waanchin nunang nil yipam ngul-nyaa wunow, puth ya a, nil ke am ngul-nyaa an

wun yuk wuuyananganwey ya a, puth nilan kanam thiich nil ngangk min ngul iiyow. A amanamana nil koyam ngul mat aak heavenak in ken yana a nilana moom wuut pi an ngul iiy-iiyan nungantang God.antangan.

<sup>3</sup> Niiy nathwey eenchin ngula a ngaantam-ngeeyin ke woyan min God.antaman wantanakana. Puth niiy ngaantam-ngeeyān Jesus.ana niiy yipam ke eenchānweya. Than pam wanchangan God.an ngangk-wayangama kal-kalin nunanga, thanana thaa-thengkathin nunang Jesus thampan, puth nilana anman God.an monkan-wak-wakan nunang.

<sup>4</sup> Pam wanch wiyangan thaachantan niiyang woyan minan yipam wantāna, puth niiyana ke ngeeyān thanang, niiyan thaampān thanang. Putha niiyana ke am yippak way anangan thaampān ke nil pam Jesus alangan ep thaamp way anangana, puth than pam wanchangana mulathin nunang, niiyangan ep ke am mulathin ya a.

<sup>5</sup> Puth kan kon-ngath niiyangwey ey? wik min anangan lat ngench thayan anpalan ey? Nil piip God.an wik inangan thaw-thawan niiyantān niiy yipam ngangk minangam iiy-iiyāna. Nilaniya ke piipiy wunpanam wik inangan thawan puk nungantamakana:

“Ayyang puk ngatharam-ang, niiy nath wayan yumpān-a, ngay God ilangana wakāng ni-iyang.

Niiy min-min ngeeyān ngayang, puth ngay thaa -thengkanang ke waking niiyang ya a.

Niiy puth ngangk wayan ke wunāna.

<sup>6</sup> Nil piip God.an wee -wee antan kaangk wunan-weya a putha puk nungantaman waa an thanangwey-a,  
an nil wakan thanang puth nil kaangk wunan thantwey, nanpalan.”

<sup>7</sup> Yaa, nil God.angan nath wakow niiyangan-a, niiyaniya ngeeyān nunang a aak thaampānweya, nil mak wakow niiyang, yaa, puth amanamana, niiyan ngaantam-ngeeyān niy puth puk nungantam paththamweya. Nilaniya ma -aathan niyangweya pam wanch puk minam yipam iiyāna ke piip thanttamangan puk thanttaman ma-aathantan minaman iiy-iiyayn. Than puth puk thanttamangan wayan yumpantan-a, yaa, piipiy al-alangana wakantan thanang, wiyiya thepantan thanang, wiyiya aak nath kuchantan thanangweya.

<sup>8</sup> Nil piip God.angan ke an wakiy niiyangweya ke nil puk nungantam wiy anangan wakan thanangwey-a, yaa, an puth meenathan niiyangan, niiyan ke puk nungantam ya ana.

<sup>9</sup> A putha wik thonangan ina ngeeyāmpa: piipiy ngamparam aak imanamana thananiya wak-wakin ngampang puk wayan iiy-iiyampa, yaa, ngampaniya mee miy ngul iiyamp thanan ma-aath-aathin ngampang puk min yipam iiyāmpa. Puth nil piip God.angana ngangk ngamparaman yumpa. Nil wakiy ngampangan-a, yaa, ngampaniya wik nungantaman ngeeyāmp paththama, a anpalaniya, ngampaniya aak min nungantamangan wunāmp.

<sup>10</sup> Piipiy ngamparamangana wak-wakin ngampangwey, wiyiya piik-piikin ngampangwey,



aak anpalman ngamp puk manyiyan iiy-iiyampa than yipam pam wanch min yumpayn ngampang. Puth wiyiya than ke mee miywey want-wanttakan woyan minangan wunpayn ngampang, ya a. Nil puth piip God.an epa mee miy want-wanttakan minaman ma -aath-aathow ngampang, wak-wakow ngampang thakan, ngamp an yipam min iiyāmp ke nil anman min iiy-iiyan.

<sup>11</sup> Nil God.angan wak-wakan ngampangan-a, an ngamp ngangk way wunanamp, ngangk minang ke am iiyanamp ya a. Puth anpalaniya, ngampaniya ngaantam-ngeeyanamp ngula nilan ma -aathan ngampang minaman iiy-iiyāmp a anpalaniya ngampana ngangk minangam ngul woyan nungantaman wak-wakanamp.

*Ngamp Wik Inangan Ngaantam-Ngeeyāmpa!*

<sup>12</sup> Yaa, ngampaniy putha ke eenchāmpweya – ngamp ke ma punth mich a yangk mich ke iiy-iiyāmpa, ngampaniya ngangk thayanam iiy-iiyāmp, ke -ngoongkam anman monkan-wak-wakāmp nunang Christ.an.

<sup>13</sup> Puungk wiyanganiya woyan Christ.antamana min-minam ke am wakantan, puth than mich yippak iiy-iiyantana, ngampaniya koochanam anman iiy-iiyāmp woyan Christ.antamang nilan meenath ngampara, ke kung-engan thu āmp ya a, ngamp yipam thanang wiy anangan ma -aathāmp than yipam woyan min Christ.antaman minam wakayn.

<sup>14</sup> A putha niy ke kulangan wakwun, ke -ngoongkam ngangk minangam iiy-iiyānwey ni-

iyantakam, a minam anman iyy-iiyān. Puth pam wanch anangan thana way-wayaman iyy-iiyantana, thananiya piip God.an ke thathiythan nunang a putha aak min nungantamangan ke wuniythan ya a.

<sup>15</sup> Niiyiya pam wanch Christians.angan min-minam pi wuna niyy yipam ke wantān nunang piip God.an, puth niyy wee -wee anangan wantān nunangwey-a, nilan ke ma -āathow niyyang. Niiy ma -aath-aathwun niyy yipam wayan ke yump-yumpān, a putha wik thaa poch-pochaman ke thawān, a putha niyy kul kath anangan ke ngangk niyantamangan pi -pi ān. Puth niyy yotaman way paththam ngul weenan.

<sup>16</sup> Niiy ma -aath-aathwun niyy ke yipam way-wayam paththam ngul weemāna ke pam Esau.ana nil way paththaman iyy-iiy aak keenkanamana. Nilaniya meechee-meecham weena, nil thaw pont-kunchantan, “Nint ngayang mayan aathān-a, a putha nintaniya ke puk kaa -ngeecham yimanangan iiyāna a nil piip God.ana min iyy-iiyow nungkar ke nil puk kaa -ngeechamantan min anman iyy-iiyan thantweya.” Nil Esau.angan may thonakam ngaantam-ngeey, God.an ya a.

<sup>17</sup> Niiy mee miya ngul-ngulana, nil Esau alan-gan kaangk piip nungantamana wik min thawowant nil God.an min yipam iyy-iiyow nungant. Nil puth piip-kunchan “ya ” thawant. Nil Esau.an peey-peey ngul piip-kunchant puth nilana kaangk koyam puk kaa -ngeechaman iiyow puth ya a, nil kan waa ant pont-kunchant.

<sup>18</sup> Niiyiya pam wanch piip God.antam ngul iyy-

iiyaniya, puth niyy ke Jews anangan keenkan wunin ya a. Niiyiya ke am um yoyk Sinai aakanakan than-than, ke am thathan thum nganth karkanangan pench-pench; niiyaniya ke am ngeey-ngeeyan ngakana wik othamayanan peey-peeya; a puth niyy ke am thathan aak ngaa paththaman ke thanan keenkan thathina.

<sup>19-20</sup> Puth niiyaniya ke am ngeeyan yuk trumpetan ke thanan keenkan ngeeyin, a puttha niiyaniya man awal God.antaman thampa ke am ngeeyan. Than Israelites.angan man awal God.antaman ep ngeeyin. Thananiya ngangk winnyang paththam mo inwey, puth nilan thaa thayanam thaw thant, “Niiy yoykana ke ma angan mamāna. Nil wee angan mamow-a, niiyiya mulathān nunang paththam. A puth minh al-alangan tha angwey maakayna, niiyiy paththama kunttow maayān a piik-piikān thanang mulakama.” A thananiya Moses.antan thawin, “Ngan kaangk ke -ngul man awal God.antaman ngeeyān.”

<sup>21</sup> Nil Moses.ang yoykan thath-a, nilan thamp winnyang ween a thaw ngul, “Ngay in akangam than-thanang a winnyang paththam weemang.”

<sup>22</sup> Puth ngamp Christians inangan ep-paththam thintham wampanamp nungant God.antan nil man-yethaman anman wun-wunan aak umpuyamana ke uthamiy ya a, ngampiya ngul iiyāmp aak-aakanakan nilan wun-wunan aak in kenyan. Aak anganiy ngaantiyongk thaa -wantanamana wun-wuntan. Thananiy aak ananiy waa antana Jerusalem ngench thayan paththaman, wiyiya Mount Zion waa antana.

<sup>23</sup> Ngampaniya pam wanch God.antam karpam iianamp aak-aakanakaman ngamp yotam karpaman yalmathwump piip God.antangan a putha ngangk minangam wun-wunāmpwey. Ngampaniy yotama ke puk kaa-ngeecham God.antam yimananganwey. Nil God.angan puk nungantam waa an ngampangan a putha namp ngamparamana kanam latangan ump aak in kenyan ngamp yipam aak-aakanakan iiyāmp. Ngampaniya aakanakan iiyāmp God.antana, nilan um nungantangan ngul thanathow ngampang a mep-mepow ngampang pam wanch yotam anangan. A puth ngampaniya karpam ngul wun-wunāmpwey pam wanch wiy al-alantangan than keenkan matin nungant.

<sup>24</sup> Ngampaniy Jesus.antang ngul iiyāmp, nilan utham ngampar nil God.an yipam wik nyi- ingkanaman thawow ngamparan, wik anangan ya a nil keenkanaman thaw Moses.antana an ya . Nil Christ.ana ke pam Abel anan ya a, an nil-nila. Nil Abel.an utham-a, an ke chaapar nungantam aakaman pech, “Cain anan mulathān nunanga, nil puth ngayang mulatha.” Puth Christ alangan chaapar nungantaman theetath ngampar nil God.an yipam kon-ngathow nunang way ngamp- pan yump-yumpamp, a puth puk nungantam ngulan waa ow ngampang.

<sup>25</sup> Yaa, ngampaniya ke thaampāmp nunang piip God.ana, nil anman thaw-thawan wik nungantam anangan ngampara. Aak keenkanamana, than pam wanchangan ke aman wik God.antaman pi-pi in-a, wik anangan pam Moses alantangan want-a, nil piip God.angana way paththam yump

thant, thanan puth ke am appenchin ya a. Puth ngampaniya kanam wik God.antaman ngeeyamp nilaman kuch ngampar Christ.antangan aak anpal kenyan. Ngamp ke wey ngeeyimp wik anangan-a, nil God.angan paththam wayathow ngampang, ngampaniya ke puth wuth-wuthanangan ngoonchimp nungantaman ya a.

<sup>26</sup> Nil piip God.angan waa pam Moses alantan wik thayan paththam nungantam anangan-a, wik nilan thaw Moses.antan-a, wik nungantamangan-a, aak ya wunyath. Puth anpalan-a, nil thaw ngampar, “Ngay aak inan puthaman ngul wunyathānga. Ngayaniya aak umyompanam inana putha aak in kenyan wunyathāng ma-thonam ngula. A amanamaniya, ngayaniya ke-ngul aakan wunyathāng ya a.” Ee a, nil piip God.an kan-kanam thaw.

<sup>27</sup> Ngayiya wik inangan God.antam engkanathāng niyant. Nil God.angan waa an yuk way min ma mangkam nilaman yump aak umyompanam inmana putha aak in kenyan, nilaniya wuny-wunyathow, amanamaniya aak umyompanam aniya minchow ngul. Puth nilam piip God.ana a putha pam wanch nungantam anangan than ep minam wunayn, ke minchayn putha aak nungantam thamp minam wun-wunow.

<sup>28</sup> Yaa, ngampaniya ngangk minangam iiy-iiyāmpwey a thaa-kuump-kuumpāmp nunang piip God.an puth nilan kalow ngampang aak nungantam aakanakan, ke an minchow, aak anana ke an wunyathow ya a. Yaa, ngampana

ngaantam-ngeeyāmp nil piip God.an moom wuut pi an paththama, nilam anman thonakama, wiy ya a. Yaa, ngampana wik ngeeyāmp nunang a monkan-wak-wakāmp nunang thama nil yipam ngangk min wunow.

<sup>29</sup>Yaa, ngampana inan ngaantam-ngeeyāmp: nil piip God.an ke thum yimanangan, nilana way-athow thanang pam wanch wayanang anangan than ke an कांगk wuntan nungant.

## 13

### *Ngamp God.an Ngangk Min Yumpāmp Nunang*

<sup>1</sup>Ngay wik inan waa āng niyant: ngamp Christians inangan कांगk wunāmp ngamparakama, ngamp ke kuunch yimanangan iyyāmpa, puth ke eenchāmp.

<sup>2</sup>Than pam wanch Christians nath wampiythan aak niyantamakanwey-a, niyan nath ngoongk-ngoongkam thanang, puth niyan min-minakam pi-pi ān thanang aak niyantanganiy. Wiyiy than pam wanch God.antam al-alangan pam wiy thamp pi-pi in thanang keenkanamana, pam than ke aman thathin thanang. A thanan ngoongk-ngoongkam than pam inangan than ngaantiyongk paththam God.angan kuch thanang ke pam yimanangan.

<sup>3</sup>Puth niyiya pam prisoners thamp ngaantam-ngeeyān thanang. Niiy ngangk mamān thanang ke niiy thampan wun-wunaniy jailangan thanatang. A putha, than pam wiyanga wayanang al-alangan Christians wiy anangan piik-piikantan thanang a thaa-thengkathantan thanangwey.

Niiy ngaantam-ngeeyān thanangweya, Christians ananganiiy a min-minakam pi -pi ān thanangwey, niiywey ngangk mamān thanang, a putha ngangk way tham wunow niiyant thanttam al-alantamana.

<sup>4</sup> An mina pama a wanchan ngentwunpu-lana a niiy pam wanch ma thum yotamangan ngangk minangam iiy-iiyān niiyantakama, niyana maarichan ke kee ān wiyantan. Nil God.ang pam wanch wayanang waa ow thanang anangan maarichan kee antan, aak wayak kuchow thanang.

<sup>5</sup> Niiy wukal-weenthan ke iiyāna, ke kaangk wunān wukal al-alantaniy, nath niiy wukal yot pi -pi aniya, nath niiy wukal many pi -pi aniya, niyan ngangk minam anman iiy-iiyān. Puth nil God.an thaw, “Ngayan niiyang ke wanting. Ngayan niiyang ngul ma -aath-aathāng.”

<sup>6</sup> Yaa, puth ngampaniya, an ep ngamp ngangk thayanam thaw-thawāmpa:

“Nil Lord.angan ngul ma -aath-aathow ngampang.

Ngampan puth ke winynyang mo āmp.

Than pam wanchangan ke wayathiythan ngampang, ya a!”

<sup>7</sup> Than pam wiy al-alangan wik Christ.antam keenkanaman waa -waa in niiyanta, an than ya -ngula kan uth-uthamin. Niiy ngaantam-ngeey-ngeeyān thanang. Thanan woyan Jesus.antam anman wak-wakin aak-aakanakaman mul ngulan wun-wunin. Woyan min thanaman meenathin niiyant-a, anman wak-wakān.

8 A in ngeeyān thampa: aak keenka nathpalmana, aak inan ke aman yippak wun-a, nil Jesus Christ.an ep man-yetham wun-wuna, nil in-inman yippak man-yetham wun-wunan a aak umpuyam ngul wunow. A putha nil wiy-wiyaman ke weeniy, ya a, an nil anman wun-wunow aak umpuyam, ke nil anman iiy-iiyan.

9 Than wiyangan wik thon nath waa iythan niiyantwey-a, niiyan ke wik ngeeyān thanang, than ke mee-wichayn niiyang woyan min anpalan. Thanan wik thayan nath thawiythan niiyanta, “Inan mungkāna!” or “Nanan ke mungkāna!” puth wik nanangan Christ.antam ya a. Niiy ke wik way anangan ngeey-ngeeyān thanttama. An wik Jesus.antam ya a. Niiyan ngangk thayan ke iiyān puth niiyan wik way anangaman ngeeyan. Nilam God.ang thonakam ma-aathan ngampang a ngangk thayanan yumpang ngampang.

10-12 Aak keenkanamana than pam wanch God.antamangan minhanim kiingkin nungant God.antana. Minhan kanan menchanam-a, than pam priests al-alangan wiy mungkinim, wiy ya ke amim mungkin. Kaap thon-thonangan uw thanang-a, nil moom thanttam priests al-alantamangana, chaapar minhantam maay-maay a aak ngench thayan paththam aakanakan kal-kal, minh inangan ngench, ke mungkin. Chaaparangana yuk altaran ma thethang mak-mak yipam nil God.angan way thanttaman ke-ngul ngaantam-ngeeyow. Anpal ngulana, thanan minh menchanan aak thonak kechak kalin, aak pam wanch ke aman wun-wunin.



Aak ang ngulana than minh yotaman kiingkiingkin puth minh ngench. A nil Jesus thampa, nil aak pi an Jerusalem angan ke am utham, ya a, nil aak pi an Jerusalem amanam kech yoon uthamwey. Nil chaapar nungantaman theetath, nil God.angan yipam way ngamparaman ke ngaantam-ngeeyowa, ngampan puth yipam God.antang wunāmp.

<sup>13</sup> Ngampan putha, woyan wayan wantāmpa, a Jesus anman monkan-wakāmpana. A than nath pam wanch wiyangan thaa-thengkathiythan niyangwey-a, a piik-piikiythan niyangwey-a, yaa, thanan mak piikayn niyang a mak thaa-thengkathayn niyang thanan puth Jesus.antan yimanang thamp yumpin.

<sup>14</sup> Ngamp puth aak earthang ingan aak umpuyam ke wunimp, ya a, ngamp kuupkuupanamp aak God.antamang ngulan wunāmp aak umpuyaman.

<sup>15</sup> A ngampan puth ngeen thee āmp nungant God.antan e? Ngampan puth mak piip God anman thaa-kuump-kuumpāmpan. A puth ngampaniya Jesus.ant ma -yotam thaw-thawāmp nungant, “Nint moom nganttama. Ngan thankyou thawān nungkara, puth nint ma -yotam ma -aath-aathangan nganang.”

<sup>16</sup> A puth inan thamp: ngamp thant pam wanch wiyantan ngangk minangam iiy-iiyāmp a min-minakam pi-pi āmp thanang. Than may a ngook ke anang thakanwey-a, ngampana thee āmp thant. Nil God.angan thathan ngampang thanang ma -aathanampan-a, yaa, nungantan ngangk min wunow.

17 Than pam wiyangan ministers a wuut manth-thayan al-alangan ma-aath-aathantan niyyang woyan God.antam wakanakan. Niiy wik ngeeyān thanang a ma thanttang iiyān puth thanan ma-aath-aathantan niyyanga, ke aman eench-eechantan, niyyan puth woyan minan yipam ke wantāna. Thanan puth mee miy nil God.angan thath-thathan thanang a ngulana nil waa ow thant, thanan work minan iiy-iiyin, nath ya yaaka, than nath way iiy-iiyina. Niiyan wik ngeeyin thanangwey-a, yaa, thanan puth work thanttaman ngangk minangam iiy-iiyayna, puth niiy ke an wik ngeeyin thanangwey-a, yaa, thanan puth ngangk way iiy-iiyiythan, puth wanttak ma-aathiythan niyyang.

18 A niiy ke -ngoongkamana mee-wuth-wuthanamān nganta. Nganan puth ngulnyaa ana ke wunan mee God.antangan ya a, puth ngangk nganttamana woyan min aakanakan kaangk wun.

19 Ngay inan putham thaa -mamanang thawang niyyanta, niiy mee-wuthanamān ngathar God.antana, nil God.angan yipam ngayang ma-aathow a ngayan yipam palaman erkam wampāng niyyanta.

*Ngay Niiyant Inana Mee-Wuthanamāng Nungant God.antan*

20 A ngay niiyant mee-wuth-wuthanamang nungant God.antan, wik inangan thaw-thawāng nunganta, “Piip God.a, nint nganang karpam nenchanathān nungkarang ngangk minangam yipam iiy-iiyāna. Nint Lord Jesus.an mulaman ekathan

nunang. A nil pam wanch nungkaram min-minakam pi-pi an thananga, ke nil pam shepherd minangan minh sheep nungantaman pi-pi an thananga. Nil chaapar nungantam theetath a puth nanpalana, nintan thawan ngan pam wanch nungkaraman iiyāna.

<sup>21</sup> God-ang, nip Christ.angana, pam wanch inangan ma-aathow thananga, thanan puth yipam woyan nungkaram wakayna, ma-aathow thanang thanan minam yipam iiy-iiyayn mee niparangana, a puth nganan Christ.an min waa ān nunang umpuyama. Yey, kan-kanama.”

*Niiy Ngangk Minangam Wik Ngatharam Inanganiiy Ngeeyāna*

<sup>22</sup> A ngay inan thaa-mamanang thawang niyanta, niiy wik ngatharam min-min ngeeyān, puth ngay wik inangan ump-umpangan yipam ngangk thayanathow niiyang. Ngay lat onk ke am umpangana, ya a, in otang yaan umpangan niyanta.

<sup>23</sup> A in ngeeyāna: than pam soldiersangan ngurp ngamparam Timothy.an jail anpalan kanam kuchin nunang. Nil erkam wampowa ngatharwey-a, yaa, nganan karpam puyan wampān niyant.

<sup>24</sup> Waa ān thant pam wanch God.antam alalantana, church nanana a puttha elders alalantan, ngan ngaantam-ngeey-ngeeyanan thananga. A than Christians aak Italy punchan alalangan thamp ngaantam-ngeeyantan thananga.

<sup>25</sup> Ngay kaangk nil God.an ngangk minangam iiy-iiyow niyanta, yey, kan-kanama. Anman kan.

**Wik Inangan Kan-Kanam God.antama  
The New Testament in the Wik-Mungkan language of  
Cape York, Australia**

copyright © 1984 Wycliffe Bible Translators

Language: Wik-Mungkan

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-05-14

---

PDF generated using Haiola and XeLaTeX on 18 Apr 2025 from source files dated 31 Aug 2023

034de520-6788-5805-9b17-b658084b38e2